

CIDIMU CYÀ CYANGA

 Mwoyi wènù dilòòlò edi, balundà bàànyì. Ndi nè disànkà dyà kwikala kaaba aka dilòòlò edi nè—nè kupeta dyakidila dilenga menemene adi, bantu bònsò biikàle baswè bwà—bwà kubwela. Bìdì bìmfikisha ku didyùmvwà bîmpè menemene.

² Ncìvwà—ncìvwà mupetè mpùngà mukùmbàne wa kwakula, anyì kulonga, anyì ní ncinyì cyònsò to, bwalu masangisha àànyì ònsò mashààle adi ànu dyondopa. Pa nàнку, mèmè ntu ànu munangè kwakula. Bantu bònsò mbamanyè aci. Ngèèla meeji nè ndi. . . Maman mmwambè nè mvwa mwakùle kumpàlà kwà mèmè kwenda. Nudi bamanyè cìdì kasùmwìnù kàà kale aka kàmba pa bwalu abu's. Pa nàнку ndi nè disànkà dyàbùngì dyà kumanya nè Nzambì mmushintùlùle mwoyi wànyì, mu mùshindù wà nè dyakula adi dikaadi Bwèndè Yéyè. Nwamònu anyì? Nè ndi muswè ànu kufwà mwikale ngààkula bwà bwalu Bwèndè, ngimba butùmbi Bwèndè nè ngèza cìndì ngèèla meeji nè ncijaalàme aci.

³ Katwèna nè dîbà dyàbùngì menemene to, bwalu tudi nè mudimu wà mèèsà à Mukalenge dilòòlò edi. Mu diisàtù dilòòlò nekwikalè masangisha à dilongesha, mutwikalà mwà kulongesha, bu Mukalenge mwà kwanyisha.

⁴ Mpindyewu, dilòòlò edi, ànu bwà katanci kakesè cyanààna, bwà tusunsa tukesè cyanààna, Mukalenge mwà kwanyisha, ndi njinga bwà. . . Cìdì ànu bu kaciyì citèkemena to, nudi bamanyè's, bwalu bitu misangu yònsò. . . Ndi ngèèla meeji nè Bible mmwambè nè: “Sùminyina mu cikondo nè pàdiku kakùyì cikondo. Ikàlà muswè kufila, anyì, mudilongòlòle bwà kufila dyandamuna bwà ditèkemena didì munda mwèbè adi.” Nè pa nàнку bu mèmè mwà kufila bujaadiki kùdì ditèkemena didì disanganyibwà munda mwànyì, èè, necìikalè dibènesha kùndì bwà mèmè kunwàmbila, nènku ndi ntèkemena nè necìikalè dibènesha kunùdì bwà kucyàkidila, nè kumanya nè ku diitabuuja dyènù didì dikùmbanangana nè cintu cìmwècimwè aci. Nènku ditèkemena dìmwèdìmwè didì munda mwànyì adi, didì disanganyibwà munda mwènù, nè twètù tudi beena-mwàbò bàà Bukalenge bwà Nzambì.

⁵ Mwà nè disànkà dyà kuumvwà matàbuluja aa mamanyisha kùdì èkèleeziyà wa ba-Méthodistes mu New Albany. Nènku ncìvwà mupetè dyà ku Louisville to, kàdì pàmwàpa nuvwà badipètè, mùvwà Mwanèètù Fleeman mutùlondele amu. Nwènù bàdì pabwipi nè matàbuluja awu, bwelààyimù. Pàtukààyi nè nùdìleejè pàmwè nè bàna bàà Nzambì, bwà kuleeja nè tudi ku luseke kaayi. Tudi ku luseke lwà Mukalenge, nè tudi baswè kwikala baleejìbwe pàmwè nè bantu Bèndè.

⁶ Mpindyewu, mu diisâtù dilòòlò, ànu mùvwà Mwanèètù Neville mwàmbè, ndisangisha dyà dilongesha. Ngèèla meejì nè bàdi munkaci mwà kwenza kàlaasà kàà dilongesha kàà mùshindù kampàndà's, kî mmwômò anyì, Mwanèètù Neville? [Mwanèètù Neville ùdi wàmba nè: "Eyowà."—Muf.] Abi's mbilenga be.

⁷ Kulongesha Dîyi kùtu misangu yònsò ànu kwìmanyika Èkèleeziyà. Tudi nè mwoyi. . . "Muntu kààkwikala nè mwoyi ànu ku dyàmpà nkààyaadi to, kàdi ku Dîyi dyònsò dìdì dipàtukà mukana mwà Nzambi." Nènku mu dindà emu tuvwa twakula bwà mùvwà Dîyi adi kadiyi mwà kupangila, mùvwàDi nè cyà kwenzeka.

⁸ Nènku paanyimà pàà bamanè kwimba, mèmè kudyàmbidila nè: "Èè, nèngàakulè pa cinyi?" Ke kumfikilabi bwà mèmè kudyàmbidila nè: "Mbàmbè nè: 'Bansantu bònsò nebiikalè nè Citampì pa mpàlà pààbò.'" Nwamònu anyi? Patwàfikà kuntwaku, bansantu bònsò nebiikalè nè Citampì pa mpàlà pààbò.

⁹ Ke mèmè kudyàmbidila, dilòòlò edi nè, ndi mufwànyine kubala katùpà kakesè kàà Mufundù mu Bible, mwaba kampàndà kaaba aka, nè, lwà mu Èvànjeeliyò mwàmwa. Nènku Yesù, paanyimà pàà Yèyè mumanè kujikija dyakula, kwambaYè nè: "Leelù ewu, nè, mèyi aa ùdì."

¹⁰ Mpindyewu, Kilistò, ku cibangidilu Cyèndè, cyà ntwàdijilu wa mudimu Wèndè wà bwambi; wàkalediibwa, mu bushùwà bwà bwalu, pa buloba apa, Mwànà wa Nzambi. Wàkalediibwa, Yesù Mukalenge, nè pashìishe paanyimà pàà matùkù mwandamukùlù, à ditengudiibwa Dyèndè, Wàkapèebwa, mpindyewu, Wàkalediibwa, Kilistò Mukalenge, èyowà's wè, nè wàkapèebwa Dìnà dyà Yesù. *Yesù* divwa "Dìnà Dyèndè difila." *Kilistò* civwa "mwànzù Wèndè" wà cyàkadiYe aci. Yèyè ùvwa Kilistò, Mwela maanyi wa Nzambi, pààkalediibwàYe.

¹¹ Nènku mpindyewu, bu mùdibi bimanya nè disangisha dyà mèèsà à Mukalenge pa ciibidilu dîtù dìnenga kakesè ndambù, nè ncyèna muswè kwakula ntàntà mupitèpite bule to, kàdi ànu ndambù mukùmbàne bwà dyà dîmpè, patùdì tuumvwa Nyumà wa Nzambi ùbwela munkaci mwètù, bwà twamònakù mwà kwenza ma—masangisha.

¹² Mpindyewu vùlukàayi masangisha makwàbò ònsò àdì mamanyishibwe awu, matàbuluja myaba yònsò, babèèdì nè bàdì mu lukèngelu. Yèyè ùvwa ànu mwakule naanyi bwà bwalu abu, ùvwa mukùmbùlè dîkù kampàndà kùkaadi cikondo kampàndà, kùvwà mwànà wa balùme kampàndà, mukwàta kùdì dyabùlù, kàdi baswè bwà kusungidiibwayè. Mpindyewu, Bible mmwámbe bwà—bwà twètù kudisanga pàmwe nè kusambidila bantu aba.

¹³ Nudi bamanyè's, dîbà adi, kùdì inābānzà mutekète kampàndà—kampàndà dìnà dyèndè Georgie Carter uvwa

mwondòpiibwe, ku cìkèèná-kumòna, kaa, kùkaadi bidimu byàbúngì. Nènku wàkapàtudiibwa mu bulààlu bwà disaamà dyà cyàdi; mwàkadiye mulàadika munda mwà bidimu mwandamukùlù nè ngondo citèemà, kàvwakù mene mubiike mu bulààlu amu to. Nènku mvwa...mèmè kuya kuntwaku bwà kamusambidila. Nènku ndi...Nudi bamanyè bwalu abu's, mùvwà taatù nè maamù kabàyi biitàbùùje dyondopa dyà kùdi Nzambi to, nènku ncivwa mwakidila bimpè menemene to. Kàdi nsongàakàji awu ùvwa muswè kwondopiibwa.

14 Pashiishe dīngà ditùkù, lwà kwà Mwanèètù Wright kwàka, mvwa kuntwaku ngènga mudimu wà—wà dibàtiiza, nènku nsongàakàji awu kujingayè bwà kubàtijiibwa. Kàdi kàvwa mwà kupàtuka mu bulààlu to, mu bushùwà bwà bwalu. Kàvwa mupàtùkemù to munda mwà bidimu mwandamukùlù anyi citèemà.

15 Nènku mvwa munkaci mwà kusambila mu cipèèlà amu, anyi mu meetu. Nènku Mwanèètù wa bakàji Wright kwelayè ngonga bwà twètù kulwa ku didyà dyà dilòòlò. Nènku mvwa ànu munkaci mwà kusambila *bikolè*, nè Bwikadi bwà Mukalenge wetù Yesù bùvwa pabwìpi menemene, mu mùshindù wà nè ncivwa mutàbàlèèle nè ngonga ùvwa ùdila to. Nènku kwisù kukaavwa kwènda kùfika. Ke mèmè kumòna Bukènè bùkenkesha lwà mu cipuka cyà mici yà tumuma twà mbèèlebeelè, nè bwàmba nè: “Nda ku njila wa kwà ba-Carter.”

16 Mwanèètù Wright, wèwè uvwa naanyi's. [Mwanèètù George Wright ùdi wàmba nè: “Èyowà's, mukalenge.”—Muf.] Nènku patwàkafikà kuntwaku, ànu menemene mùvwà cìkèèná-kumòna aci cyàmbè, mùshindù awu ngùvwàbi byenzèke. Ke Georgie kwondopiibwayè pa cibànza, kuumukila kwàkadiye mu lutàtu bidimu citèemà nè ngondo mwandamukùlù, kàyi mutentèmùkekù mu bulààlu amu to. Nènku yèyè kacya kàtukù mwànji kwalukila mu bulaalu amu to, bwà ku dyànyi dimanya, ànu yèyè mupete cimpumpu anyi cintu kampàndà, too nè mpindyewu.

17 Kàdi ndi mùmvwè nè ùdi ùsaama bikolè byà menemene. Patùvwà twenza disangisha adi kwà Mwanèètù Wright ewu, kumpàlà kwà mèmè kuumuka kuya dyàmwàmwa dyà mbù, mwànà wa bakàji awu ùvwa kuntwaku. Nènku mvwa mwà...Mèmè kwambila Mwanèètù Wright, paanyimà pàà yèyè mumanè kuumuka, cintu kampàndà mu Nyumà wa Mukalenge kutùngùnuka nè kunsàka bwà mèmè kuya kùdi Georgie. Nènku mpindyewu ndi ngùmvwa nè ùdi mu citùpà cyà ndekeelu cyà kànsèrè mu dibèèle. Nè yèyè ùkaavwa mulekèle, bwà kufwà, nè ùvwa nè cyà kutùngùnuka nè kwitaba lufù lwèndè.

18 Nènku bàmbe nè mmùmvwè nè ndi mwalùkile, nè, mwoyi wèndè mukesè awu wùbèneshiibwè, mmupàtùke mu bulààlu amu, nè mwàmbe...mwitàbùùje nè mmufwànyine

kwondopiibwa mpindyewu. Pa nànkù aci's ndiitabuujà dyàbùngì, ndi...bwà kwitabuujà nè—nè Nzambi neúmvwè masambila à bantu bàà cifwàkà. Pa nànkù ndi—ndi—ndi munangè Georgie, bu mwanèètù wa bakàjì. Nè ndi muswè bwà wèwè kudisanga naanyì mu disambila, bwà Nzambi wàlama mwoyi wèndè. Ndi...bu Yèyè ànu mwà kungambila cyà dyamba mpindyewu pangààfikàku.

¹⁹ Bakwàbò bààbùngì menemene. Mukalenge Wiseheart, Mwanèètù Jim Wiseheart uvwa nè ciibidilu cyà kulwa kaaba aka awu, mwànà wa balùme wa mwanààbò ùdi kuntu kwàka mu lùpitaadi. Mmufùme ku dibìikila, mwikale nè disaamà dyà Hodgkin. Adi's ndibì kutàmba kànsèrè, nudi bamanyè's.

²⁰ Nènkù tuvwa nè dyà bwena adi dyondòpiibwe, ànu mwab'ewu mu tabernacle emu, matùkù mashààle aa. Nudi bavùlùke, nsongààkàjì wa citende awu, uvwa ngàngàbukà mupèèshe matùkù makùmi àsàtù bwà kwikalaye nè mwoyi; ùvwa mulongi wa mu tùlaasà tutùmbùke kaaba aka. Ke mamwèndè kulwayè è kufila mwoyi wèndè kùdì Kilistò nè kubàtìjìibwayè, nè nsongààkàjì awu, pèndè. Ke kwambabò nè: “Musokòkaayi bwalu abu, kanùmumanyìshì nè lufù lùdi pambidi pèndè to.” Kàdi kumpàlà kwà cyòci aci, pàmvwà ngènda mpweka nè mulongo mwab'ewu, mu dindà adi, Nyumà Mwîmpè kumupyà, ùvwa mumanýè ciwàye mwènzè, nè bikwàbò. Ke kwondopiibwayè pa cibànzà, mu mùshindù wà kabàyikù nànsha mwà kupeta katòbà kàadi to. Nènkù aci's nkukaadi bidimu bu bibìdi anyì bisàtù nànkù. Ke mèmè kutuutakeena nè mwànà wa bakàjì awu, kùkaadi bu cidimu cijimà nànkù awu. Ngèèla meeji nè ùdi ku dibàkà mpindyewu nè mubidi tumatuma, kacya kabàtukù badimòne kàbìdi to.

²¹ Mpindyewu, Nzambi ùdi mwà kwondopa disaamà dyà Hodgkin. Kabyèna nè cìdibi bìshintulula to. “Mèmè ndi Mukalenge udi wondopa màsaamà èbè ónsò.” Pa nànkù twàkulààyikù Nèndè, katanci kakesè, bwà...bwà bwalu bwà babèèdì, nè bwà ditùngunuka dyà mudimu.

²² Mpindyewu, Taatù wa mu Dyulu wa musàngeelu, bu mutùdi badisangishe kaaba aka mu kaaba kakesè kalenga aka, pàmwàpa kakàyi kalenga kàà menemene to ku mèsù kwètù eku, bwà kutàngila, kàdi, Taatù, tudi tudyùmvwa menemene kwètù kumbèlu mwab'ewu, bamanyè ànu nè Wèwè udi mutùbènèshe misangu bùngiyi. Ndi ndyùmvwa, mu kaaba kakesè aka, bu Yakòbò, dilòlòlò adi, paanyimà pàà mumanè kunyeema mwanààbò; kupetayè cìkèèna-kumòna, kumòna Banjèlò bàà Nzambi bàbànda bàpweka ku cibàndilu; wàkakùngwiya mabwe awu pàmwè è kwamba nè: “Ewu n'nzùbu wa Mukalenge.” Taatù, ndi ndòmba bwà Ùbeneshèku aba bàdi badisangishe mu nzùbu wa Mukalenge emu, dilòlòlò edi, ku Betèlà.

²³ Tèèlejààku masambila ètù bwà aba bàdi bàsaamà;

nsongààlùmè mukwàciibwe kùdì démon udi munkaci mwà kukumbula mwanèètù wa balùme awu.

²⁴ Nènku tudi tulòmba bwà Georgie mwànà awu, Mukalenge. Nzambi, kwitabikù bwà lufù lùmuninè to. Wèwè's ngwakamupàndisha, kùkaadi bidimu dikùmi nè bìbìdì, dikùmi nè binaayi mpindyewu, nènku ndi ndòmba bwà Wèwè kutungunuka. Wèwè Úvwa mufwànyine kuumusha disaamà dyà cyàdì adi munda mwèndè, udi mwà kuumusha kànsèrè aku mu yèyè. Wèwè udi Nzambi. Nè tudi baKunangè, Taatù, nè tudi tulòmba cyòci eci nè diitabuuja dyà kadiyì dinyungishiibwa.

²⁵ Nènku mu lùpitaadi amu, nsongààlùmè wa citende awu, mùsàlaayi wa citende awu mmulààlemù, ùpunga nè lufù, ditèkemena dyònsò dimanè kuya. Kàdi, Taatù, mùvwa mmu dibà dyà mùshindù awu adi, paWàkaakulà nè Pòlò, kwama nè: “Ikàlà nè dikima, Pòlò.” Akùlàku cyàkàbìdì, Mukalenge. Ndi ndòmba bwà Wèwè kupàndisha mwoyi wà mwànà wa balùme ewu. Enzàku nànkù. Swàkù bwà yèyè kàfùku to, Mukalenge. Swàkù bwà ikalè nè mwoyi, bwà butùmbi bwà Nzambi bùtwadiibwè mu mwoyi wèndè.

²⁶ Tùkwàcishèku, dilòlò edi, mpindyewu mu disangisha edi. Tùfwilèku luse ku mpèkaatù yètù. Katùyì bamanyè dīyì nànsha dimwè dyà kwamba to, tudi tuKulàmbula bintu byònsò, nè pashìishe tulòmba bwà butùmbi abu bwikalè Kùdì, bwalu tudi tulòmba nùnkù mu Dìnà dyà Yesù, Mwànà Webè. Amen.

²⁷ Mpindyewu, mèmè ntu munangè kwakula ànu bwà Ewu utùdì tukuukwila kaaba aka, Mukalenge Yesù. Yèyè mmwimpè be kutùdì, nè twètù bònsò tudi baMunangè. Ndi mutwishìibwe, dilòlò edi nè, ncifwànyine kwikala cyà mu ndòndò menemene wa myoyi yètù, bwà kumanya nè Yèyè úvwa munkaci mwètù, bu twètù ànu mwà kuMumòna. Kàdi Yèyè ùdì kaaba aka, nènñüjaadikilè cyòci aci. Bwà nè Nyumà Wèndè udi úja buloba, mbù, nè dyulu awu, ùdì mu dibàlaasà edi pàmwè neetù dilòlò edi. Nè Yèyè—Yèyè, twètù. . . Disaamuna dyètù didi diitabiibwe ku mèsù Kwèndè, nè Yèyè ùtu munangè kukuukudiibwa.

²⁸ Mpindyewu bwà meeji makesè à nshindameenu, pa nè mbwà cinyì tudi kaaba aka. Nzùbu wa Nzambi nznùbu wa dilongolwela bilèma. Mikenji yìdì yìpàtukila mu nzùbu wa Nzambi.

²⁹ Nènku ndi ngèèla meeji nè, mu cikondo citùdì nè mwoyi eci, nè nangànanà mu mèbà à mīdimà aa, paanyimà pàà mèmè mumanè kuya nè ntàngila matùnga ònsò, kùdì ditèkemena ànu dimwèpelè dīndiku mwà kumòna dishààle, nè aci n'Dilwa diibìdì dyà Mukalenge Yesù. Nè Yèyè ùdì mutwishìibwe ànu bwà kulwa, ànu mùvwa Ye kaaba aka musangu wà kumpàlà amu. Ndi ncìitabuuja nè mwoyi wànyì wònsò, nè mwoyi wànyì wònsò.

³⁰ Bwalu, Dīyì Dyèndè, mutwāmònu mu dīndà emu amu, didi nè cyà kuula. Cìdi mmeeji à Nzambi maleejìibwe patòòke ku Dīyì Dyèndè, nè mavwijìibwe bwalu bulelèlè. Tuvwa nè

cyena-bwalu mu dindà emu, bwà bàmwè bàà ku beenyi nè: “Ku cibangidilu kwàkadi Dìyi, nè Dìyi dyàkadi nè Nzambi, nè Dìyi dyàkadi Nzambi.” Mpindyewu, Dìyi òvwa cibangidilu. Kàdi kumpàlà kwà kwikalaDì Dìyi; Dìyi kampàndà—kampàndà mmeeji mamwèneshiibwe. Bivwa bikèngela bwà Nzambi kuDyèlela meeji kumpàlà kwà kucivwijaYè Dìyi kampàndà. Pashiishe kwakulaYè Dìyi, nè Dyôdi kudivwija dyà bàlenga nè byanza.

³¹ Mpindyewu, Yèyè umweùmwe wàkatùma Mukalenge Yesù pànwàpa awu, ku Dìyi Dyèndè dyakula, Dyàkavwijibwa dyà bàlenga nè byanza nè kulwaDì Mwànà wa Nzambi; kufwà, bu uvwa kàyi mwenze bwalu bwà bantu bapiile, bwà kutùpikula kutwàluja ku bwobùmwe nè Nzambi. Bwà twàfwànyina twètù, bàvwa musangu kampàndà beenyi kùdì Nzambi, twàmònakù mpindyewu mwà kuseemejiibwa pabwìpi nè Nzambi, ku mulàmbù wà Mashì à Mwànà mwakàne wa Nzambi. Ànu bulelèlè mwàkalwà Yesù musangu wà kumpàlà amu, bu Mupikudi amu, Ùlwalwa musangu mwibìdì bu Mubàki. Yèyè—Yèyè—Yèyè ùlwalwa.

³² Kàdi, nànsha nànkù, misangu yàbùngì tutu tudyàmbidila nè: “Èè, kùdì...Kaa, s’kùkaadi kwenze ntàntà mule. Nè tutu badyàmbidile nùnkù munda mwà bidimu.” S’ke cyàkadyàmbidilàbo kumpàlà kwà Dilwa Dyèndè dyà dyàmbedi. Nènku mbenzèjiibwe bwà kwela meeji àmwèàmwe awu ku Dilwa diibìdì. Bwalu, Bible mmwambè nè bàvwa mwà kwamba nè: “Kakwèna dishiilangana nànsha dikesè kutàmba cikondo cìvwa baatatwètù bààkalàlà tulù mu lufù aci to.” Kàdi mmu dībà dyūdi kùyi welela meeji adi, mmwènzekàbi. Mpindyewu mbujitu butwimikila...

³³ Mu Àmèrikè, bu beena Kilistò bàà cyena Àmèrikè, Nzambi neàtùlombè byàbùngì ku byanza byètù, bwalu tudi nè Bukènkè bulelèlè bwà Èvànjeeliyò kàdi tupangila bwà kukwàta naaBù mudimu bu mùvwàbi bikèngela bwà twètù kucyènza amu. Pa nànkù, dilòlò edi, ndi muswè kwakula nè mwena Kilistò, pa bìdì bitàngilà mùshindù wùdì mwà kubungamija cikondo cyà kanyinganyinga bwèbè wèwè; nè mùdì mufwànyine kwikala mukàngila pambèlu kakùyì mpatà to, kùyì mu bwobùmwe nè Kilistò to, ku dyenza dyà disungula dibì.

³⁴ Mpindyewu, bintu ebi mbipapàkàne ndambù. Kàdi’s bìdì bikèngela bwà kukolabi, ku musangu nè ku musangu, bwà—bwà kutùfikisha ku dyanyisha Mukalenge Yesù.

³⁵ Mwanèètù kampàndà mmutwilàngàne naanyi, leelù ewu, pàmvwà munkaci mwà kupàtuka apu, è kwambayè nè: “Mwanèètù Branham...” Lutàtù lwà myandà yà mpetu mmitàcishe mwoyi wèndè. Yèyè nè: “Paanyimà pàà bamanè kuumvwa bwalu bwà bantu bakwàte nè byà luse bàà mu Inde abu, nè bikwàbò,” yèyè nè, “kàdi nànsha nànkù musangu

wônsò. . .” Yêyè nè: “Ndi nè bukolè bwà mubidi, nè, kàdi bintu byônsò ebi bidi misangu yônsò ànu bincyòkesha.”

³⁶ Mémè nè: “Mwànà wa balùme yônsò udi ulwa kùdi Nzambi ùdi nè cyà kunyookiibwa kùdi Nzambi.”

³⁷ Muntu nè muntu, tudi ànu nè cyà kuteeciibwa; mfimbù wa Nzambi mmutwàmbika pambidi, nànsha tumwèka bu katùyi benze bwalu to. Nzambi ùdi wènza nànkù bwà kujaadika nè twètù tudi bânà. “Aba bàdi kabàyi mwà kutwàla dinyooka mbânà balela mu masandi,” anyi kî mbânà balelèlè bàà Nzambi to. Kàdi mulùme awu anyi mukàji udi mwà kutwàla nè kwitaba dyediibwa dyà mfimbù awu, nè bintu byônsò byènda bibi, ùtùngunuka ànu nè kujuula mèsù kwamba nè: “Mukalenge, ndi muKunangè,” ke yêyè awu. Mbwenà kwamba nè: “Ewu—ewu udi ukolesha mwoyi too nè ku ndekeelu, yêyè umwèumwè awu neàsungidiibwè.” Mpindyewu, ndi munangè aci, kàdi nwênù?

³⁸ “Kàdi bamanyè eci nè, dikènga dinène dìdi dítwàla lutùùlù; lutùùlù lùdi lùtwàla ditékemena; ditékemena kadyèna dífwishà bundù to.” Ki bwalu mbwòbù abu’s. Nwamònu anyi? “Makèngeshiibwa àdi àtwàla lutùùlù.” Ikàlà nè lutùùlù. “Nè ditékemena kaditu dífwishà bundù to.” Nènku tudi nè ditékemena, dilòòlò edi. Mu makèngeshiibwa ètù ônsò, nànsha nànkù, dìdi dikwàcisha. Makèngeshiibwa àdi àtùvwija nè lutùùlù, bindile Dilwa dyà Mukalenge.

³⁹ “PààbuuludiibwàYe mu Dyulu bwà musangu mwibìdi, mu butùmbi nè bunème, mbù neàpatulè bafwè bèndè. Mibidi yà yìbola yà bàdi balààle tulù, mu Yêyè abu, neyishintulukè nè yìvwijiibwa mifwànàngàne nè mubidi Wèndè Yêyè mwinè wà butùmbi awu, mùdìYe nè bukolè bwà kuvwija bintu byônsò ku bukòòkeshi Bwèndè Yêyè mwinè.” Nènku tudi cinyi dilòòlò edi, ànu kwikala beena Kilistò bàà disànkà, tucyònkomoka, bindile ditùkù dinène dyà Dilwa dyà Mukalenge adi.

Yesù, apa, ngwàkula cyàkàbìdi pa Dìyi.

⁴⁰ Kwènji katanci, kwàkadi mwanèètù wa balùme kampàndà munanga mulwè bwà kummòna mu katanci kakesè emu, ùdi mwà kwikala mu nzùbu emu mpindyewu, Ncyèna mumumòne to, kàdi kwambayè nè: “Mwanèètù Branham, ndi ngàanyisha Dìyi.” Ke cyòci aci’s, Dìyi! Dìyi ndijaadikiibwe. Ncintu cidi. . . Kwèna mwà kwikala nè diitabuujà ànu pa cintu kampàndà cidi muntu kampàndà mwambe to. Cidi nè cyà kwikala nè cishimikidi. Kàdi cishimikidi cikwàbò civwà mwà kwikala cinène kutàmba Dìyi dyà Nzambi ncinyi? Pààjìmina, maulu ônsò nè buloba, kàdi Dìyi Dyèndè kadyèna ànu nè ndekeelu to ànu mùdi Cyendèlèlè amu. NeDitungunukè ànu nè kuya kumpàlà, kashidi Nediikale dimwèdimwè adi. Mònaayi, Yesù. . .

⁴¹ Mùdibi bìkèngela bwà twètù kulwijakaja mpindyewu mene ku cyena-bwalu eci, bwà mudimu wà mèèsà à Mukalenge. Nènku’s ke cyètù citùpà ncyòci aci. Mulùme yônsò mpindyewu,

nè mukàjì, mwànà wa balùme anyì wa bakàjì, udi usòka Dìnà dyà Yesù awu, longòlòlaayi myoyi yènú mpindyewu, bwà kudilongolola bwà mèèsà à Mukalenge. Kaa, s'ncintu cilenga be. Nzambì wàkamba, Yesù Kilistò wàkamba nè: “Nwènú. . . Ewu udi udyà mubidi Wànyì, ùnwa Mashì Àanyì, ùdi nè Mwoyi wà kashidi, nè Mèmè nèmumujuulè ku ditùkù dyà ndekeelu. Kàdi ewu udi kàyì ùdya to, kèna Naanyì mu bwobùmwe to. Nè ewu udi udyà nè ùnwa kàyì mukùmbànyine to, ùdyadya nè ùnwa dipiila dyèndè yèyè mwinè.” Cikondo kaayipu's wè! Mpindyewu tudìlongòlòlàayi bwà bwalu bunène, bwà butùmbi ebu, mu katanci kakesè emu. Cìmwè cyà ku byà bitàmbe bunène, ngèèla meeji, bitùdì naabì mu tabernacle emu, ndilòlò dyà mèèsà à Mukalenge.

⁴² Mpindyewu, mu matùkù à ntwàdijilu à mudimu wà bwambi wà Mukalenge wetù panwapa, Wàkabwela mu Kaapènumà, ngèèla meeji, cyàkàbìdì. “Nè Yèyè kusòmba panshì, mu dyà Nsabatu, mu ntempèlù. Ke mwambi wa mu ntempèlù kuMupèsha mukàndà muvùnga awu bwà kubala.”

⁴³ Bu nwènú mwà kumòna, tudi nè bìmwe byà ku bilèlè bìmwebimwè abi. Yesù, Yèyè ùvwa mwà kubala Mifundu, pashìshe kushindamijila dilongesha Dyèndè pa Mifundu. Míngà misangu bìvwa bibèngangana nè cìvwà beena Yudà bèèla meeji nè mmùvwàbì, kàdi, nànsha nànkù, nganyì udikù mwà—nganyì udikù mwà kuMufùnda? Yèyè ùvwa Mukalenge wa Butùmbi.

⁴⁴ Nènku Yèyè kubala Mwòmò amu mwaba wàkambà Yeshàayi nè:

Yèyè mmungeele maanyì bwà kuyiisha cidimu cyà ngàsà cyà Mukalenge.

⁴⁵ Nè pashìshe pàakenzàYe nànkù, Wàkaùbwikila, nè kuvùnga mukàndà muvùnga awu, nè kuwùtèeka panshì; kukùdimuka kùvwa bantu, nè kwamba nè:

Ditùkù edi dīyī edi ndyūle kumpàlà kwènú.

⁴⁶ Mpindyewu, Yeshàayi, bidimu nkàmà yàbùngì, pàmwàpa pankacì pàà bidimu nkàmà yitaanu nè nkàmà mwandamukùlù kumpàlà kwà cyòci eci, ùvwa mwambè cipròfetà ku disonsodiibwa, nè Kilistò, pààlwàYe, Yèyè ùvwa mufwànyine kwikala mwela maanyì “bwà kuyiisha cidimu cyà ngàsà cyà Mukalenge.” Dìbà adi bìvwa bìkèngela kulwacì ànu menemene mùshindù awu, bwalu Nzambì, ku mupròfetà Wendè, ùkaavwa mwakule Dīyī Dyèndè, nè Dīyī Dyèndè dīdī nè cyà kwenzeka.

⁴⁷ Bu mutwāmònu mu dīndà emu, pa Yeshàayi, nè bantu. . . Nànsha mùvwà Yesù mwenzè byenzedi byàbùngì byà bukolè kumpàlà kwàbò amu, nànsha nànkù, kabàvwa mwà kwitabuujà to, bwalu Yeshàayi wàkamba nè: “Nganyì udi mwitàbùje mulubù wetù? Nkùdì nganyì kùdiku dibòkò dyà Mukalenge dibuulùdìibwe?” Yèyè kwamba nè: “Bàdi nè macì kàdi kabàyi mwà kumvwa to, nè bàdi nè mèsù kàdi kabàyi mwà kumòna to.

Nè bwà bààfwànyinakù kukùdimuna mucìma.” Bwalu Yeshààyi wàkamba nànkù, díbà adi bantu kabàvwa mwà kuumvwa bishimà nè bikwàbò bìvwà Yesù wènzà kumpalà kwàbò abi to. Nudi bamanyè nè, cipròfetà cìmwècìmwè aci. . . ?

⁴⁸ Mònaayi nè, cipròfetà cìdi cìdyàmbulula. Nuvwakù bamanyè nè Méyì à Nzambì àtu ènzuluka, àbwela mu bipungu anyi? Cileejilu, musangu kampàndà mu Mifundu, ngàkabala mwaba awu, nè mvwa nteeta bwà kwangata mèyì à kumpengà kwà dibèji, mu Bible mujimà amu, mwaba wùdici cyambè mu Yes-. . .mu Maataàyi, nshapità mwi2, mwaba, anyi nshapità wa 1, ngèèla meeji, wàkamba, mwaba wàkuujiibwàwu kùdi Mukalenge awu, kùdi mupròfetà nè: “Ngààkabìikila Mwan’Àanyi pambèlù pàà Èjiipitù,” wàkula bwà Yesù mwikàle mubìikidiibwe bwà kupàtuka mu Èjiipitù. Cyàkatèediibwa kàbìdi, pààkabìikilà Nzambì Izalèèlà bwà kupàtuka, bwalu Izalèèlà ùvwa mwan’Èndè. Nè Mufundu wùvwàbò. . .ùvwa Maataàyi ùleedilakù awu, ùvwa m’Mufundu mwinè mùvwàYe wùbìikila mwan’Èndè, Izalèèlà, pambèlù pàà Èjiipitù, Wàkabìikila kàbìdi Mwan’Èndè, Yesù awu, bwà kupàtuka mu Èjiipitù. Nwamònu anyi?

⁴⁹ Nènku Mifundu eyi, dilòòlò edi, yitùdi tubala Mwòmò emu eyi, mmyùle cyàkàbìdi mu matùkù à bàà Bisàmbà byà bendè. “Bàdi nè mèsù kàdi kabèèna mwà kumòna to. Bàdi nè macì kàdi kabèèna mwà kuumvwa to.” Nè Nzambì ùdi wènzà bishimà nè bimanyinu nè maalu à kukèma, nè bantu bàdi ànu bàbwita mèsù ku bwalu abu, bwalu cipròfetà cìvwa cyàmbè nè bìvwà mwà kwikala nànkù.

⁵⁰ Mpindyewu, Yesù ùvwa mwamba mu cipròfetà, kùdi Yeshààyi nè: “ùvwa mwà kuyiisha cidimu cyà ngàsà.” Ke citùdi baswè kwakwilapù, dilòòlò edi, mpindyewu. Mpindyewu, *cidimu cyà ngàsà*, cìvwa ng’eci, nè, mu cikondo cyà pankaci pàà bidimu *bùngi kampàndà*, *cidimu cyà ngàsà* mmùdi cidimu aci cìbìikidiibwa, mu Mifundu yà Kale nè: “cidimu cyà cyanga.” Cìvwa cìlwa ku byònsò. . .Ngèèla meeji nè cìvwa anyi. . .Bidimu mwandamutekète byònsò bìvwà cidimu cyà cyanga.

⁵¹ Nènku bidimu mwandamutekète byònsò bàvwa bàlekela buloba bwikisha. Kabàvwa bàkùnàmù bimuma to, anyi nànsha. . .bàkùna byà pa madimi to. Bààlekela byà pa madimi byàbò, mu budimi, bìkisha, bidimu mwandamutekète byònsò; nènku mu ciinè cikondo aci cìvwa cyanga.

⁵² Nè musangu wònsò wùvwàku mupika kampàndà musùmbìshìibwa, anyi mwena Ebèlù kampàndà, muntu ùvwa musùmbìshe bàna bèndè ku bupika. . .

⁵³ Mpindyewu, aci’s cìdi cyùmvwika bu cintu cyà cyènza bwòwà, kàdi mvwa mwimàne kùkaadi ndambù wa malòòlò nè mutàngile cintu cìmwècìmwè aci cyènzeka. Pàvwà, balùme mwà kutwàla bàna bààbò bàà bakàji, nsongààkàji, bàbàtèeka

mu cisalu cyà bapika, nè bàbàvùùla bilàmbà, nè bàbàsùmbisha bu bapika. Umwe wa ku balùmyàná bàvwàmu abu, kí mmu wètù musùmbà to, kàdi bàvwà badisange neetù kuntwaku, kusùmbayè nsongààkàjì mulenga, bwà ndola makùmi àsàtù nè yitaanu, nè kupeta mu—mufundu kùdi mikenji, ànu mùdi upeta mukàndà wà bwena-cintu bwà kàshinyi amu. Bàmwè bàbàsùmbisha ku ndola dikùmi. Bàmwè bàbàfìla ànu ku bitupù. Nè mùshindù wùdibi nè, mu mwaba kanà wònsò mùdi Dìná dyà Yesù Kìlistò kadiyì dineemeka to, bantu nè bakàjì bàdi bàlwa ànu nyama yètù eyi.

⁵⁴ Nè mushindu mwinè wùvwabi bìkèngela bwà twètù kutùmbisha Nzambì bwà ditùnga ditùdi basòmbèlemù edi, kwà nsòmbelu mulenga nè bikwàbò. Mbyà bundù be mutùdi twenza bintu bitùdi naabi, budishikaminyi bwà Nzambì.

⁵⁵ Mpindyewu, bàvwa mwà kusùmbisha mupika. Dìbà adi mwànà wa bakàjì ewu—ewu, mpindyewu, ùdi mwà kupàtuka nè kwikala mukàjì, anyi ùdi mwà kwikala musadidi mukàjì. Bàdi bàmusùmbisha; bàtàngila mènù èndè awu, bàmòna mùdiye nè dikàndà, ní ùdi mwà kwenza mudimu anyi to, anyi ní udi virgò anyi to, nè bikwàbò. Nènku udi mwà kubàsùmba, kupeta bùngì bwònsò bùdi muswè abu, bùngì bwònsò bùdi mwà kukùba abu, bùngì bwònsò bùdi mwà kufucila mfrangà abu.

⁵⁶ Nènku, mpindyewu, cintu cìmwècìmwè aci cìvwa mu matùkù à Mukalenge, pàvwàbo mwà kwangata mupika nè kumusùmbisha. Pashìishe, bidimu mwandamutekète byònsò kùvwa cidimu cyà cyanga cìvwa cìlwa. Mpindyewu, eci cìvwa ncikondo cinène, nè cìdi nè dymvwija dinène kùdi bantu bàà leelù ewu. Cikondo cinène!

⁵⁷ Mpindyewu, bapika bàvwa bafwànyine kwikala mu budimi, anyi kwònsò kùvwàbo aku, ku mudimu, nè pashìishe pàmwàpa bakònàme mwìnshì mwà bujitu bwà mfùmù wa mudimu, mwena cintu awu. Nè yèyè ùvwa mukalenge mujimà nè mfùmù kumutù kwàbò, bwalu ùvwa nè mikàndà yìvwa yìleeja nè mupika ewu ùvwa wendè. Ùvwa mwà kumwenzeja bu kàbalù, anyi cyònsò cìvwàye muswè aci. Ùvwa mupika wendè.

⁵⁸ Kàdi, dìbà adi, mu bidimu mwandamutekète byònsò, cìvwa mmukenji wà Nzambì, bwà nè kùvwa cidimu cyà cyanga. Nènku pàvwa cidimu cyà cyanga eci cìlwa, dìbà adi mwakwidi ùvwa ùnyùnguluka ditùnga dijimà, mwikàle wèla mpungi, nè mupika yònsò ùvwa musùmbiibwe ku musinga kampàndà, nè mulwè musadidi, ùvwa ùpèèshiibwa dyèsè dyà kuvwijiiibwa mudishikàmine, wàlukila kàbìdì kumbèlù, wàlukila kùdi bananga bèndè. Ùvwa mupikùdiibwè, ku ngàsà. Kabìvwa bìkèngela bwà kufùtayè cintu nànsha cìmwè to. Bananga Bèndè kabàvwa nè cyà kufuta cintu nànsha cìmwè to. Cìvwa ncyenzedi cyà Nzambì. Ncimfwànyì cilenga kaayipu's wè!

⁵⁹ Leelù ewu, nè balùme nè bakàji, mu ditùnga dyètù nè myaba mikwàbò yònsò, mbadisumbishe bwà kwenza mpèkaatù, bànwa maalà, bànàya twartà twà mfrangà, bàpìcisha dībà mu dinwà dyà maalà, bènza bintu bìvwà kabìyi bikèngela bwà kwenzabò to, kàdi bàlwa bapika kùdi dyabùlù. Bàmwè. . .

⁶⁰ Mwawa mutwilàngàne nè nsongàakàji kampàndà wa citende, mwab'ewu ànu àbìdì àdì panshì aa. Yèyè kwamba nè: “Mwanèètù Branham, ndi mufwànyine kufila cintu kanà cyònsò bu mèmè ànu mwà kukòsa lukànù lwà wiskì elu.” Yèyè nè: “Ngàkabanga pàncìvwà mwànà mutekète, mwawa ngèndakana nè mwànà wa balùme kampàndà uvwa unwà maalà. Twètù kubanga kusambakaya maalà, ke mèmè kulwa mupika mupwàngàne wawù. Mèmè ncìyi naawù to,” mwàkambàye, “ndi ànu ntomboka. Bu mèmè ànu mwà kutàpulukaku naawù!”

⁶¹ Mèmè nè: “Kwèna mwà kudyènzèlaci wèwè mwìnè to, kàdi ndi mumanyè Kampàndà Udi mwà kukucibwilaci. Mukalenge Yesù Kilistò mmulwè bwà kukushiya mudishikàmìne.”

⁶² Mpindyewu, bu nwènù mwà kumòna, mu cimfwànyì, cidimu cyà cyanga aci cìdì cìpingana cyàkàbìdì mpindyewu. Ku musangu nè ku musangu kùdi ditàbuluja dìdì dilenga ditùnga; twafùmu ku dipeta, ditàbuluja dinène dyà ba-Gallois adi, kì nkwanjì kwenza ntàntà to. Bantu...tudi bafwànyine kuya kangata ba-Billy Graham nè ba-Oral Roberts mu ditùnga dijimà, myaba yònsò. Nènku nànsha twètù bateetè munyì, nànsha twètù bateetè kulongolola bantu bèètù kubàvwija pàmwè bìshi, nè kubàswika, bìdì bikèngela bwà Nzambi àtwalè ditàbuluja. Nànsha byòbì nè. . .

⁶³ Tudi tuteeta kwikala nè bulongolodi bwà Beena Kilistò bàà Kantu-ku-byanza. Abi's mbimpè. Mpindyewu bàdi bateeta kwenza nsangilu wa—wa bambi bàà kabàyi bàsungulujangana bilondèshìle màngumba to. Byònsò abi's mbimpè. Kàdi, mwanèètù, bu mùcidìbì ànu nè mmuntu wetù ewu, kabyàkwikalakù nè mushinga nànsha mukesè to. Kàdi bìdì bikèngela Nyumà wa Nzambi bwà kubwelayè munkaci mwà bantu!

⁶⁴ Mpindyewu mu ditàbuluja dinène dyà ba-Gallois dyàkabangà adi, aci cìvwà ncikondo cyà cyanga bwà bantu bàà ba-Gallois abu. Ke kubangakù, ànu musùmbà wà bantu kabàyi balonge mukàndà to, bàyiisha ànu Èvànjeeliyò. Ke bukolè nè butùmbì bwà Nzambi kubangabù kumata, too nè pàvwà beena kantu-ku-byanza bafwànyine kuya bwà kwenza mudimu nè kusùmba ku mèèsà àabò à mudimu, nè bàdila bu bàna bakesè, nè kukànga masangis-. . . midimu yàbò. Baabidimè mu budimi bafwànyine kwikala basòmbe pa nkàsù yàbò anyì munkaci mwà kudima. Mbafwànyine kwimanyika bisùmbù byàbò nè kupàtuka mu budimi, bangènzàmpèkaatù bèèbè bà èyo, kàdi bèèla byanza byàbò muulu kùdi Nzambi, nè bàdila

bikolè bàlòmba luse. Bantu bènda mu njila, nè myaba yònsò. Ke nshìbà kutwàdija kudila, nè bikwàbò byònsò. Ditàbuluja divwa dikùtùke.

⁶⁵ Ke cidi cikèngela Àmèrikè dilòlòlò edi ncyòci aci. Kabyèna bikèngela Billy Graham to, anyi kabyèna bikèngela Oral Roberts to. Cidi cìmukèngela, dilòlòlò edi, n'Nyumà Mwîmpè ùkwàta mudimu munkaci mwà bantu, ùkòbola cidimu cyà budishikaminyi. Ncyà bushùwà. Kabyèna bikèngela bulongolodi bupyabùpyà to. Kabyèna bikèngela ndongolwelu mupyamùpyà to. Cintu cìmwèpelè cidi cìmukèngela n'Nyumà Mwîmpè ùlwa mu bukolè bwà ditwishisha. Udi mufwànyine kuyiisha Èvànjeeliyò too nè muwàtòlokà mvyà; udi mufwànyine kwenza bimanyinu nè maalu à kukèma too nè muwàtòlokà mvyà; ànu Nzambi mumatè mu cyalu munkaci mwà bantu nè mukwàte mudimu.

⁶⁶ Mòna's, pààkabangà ditàbuluja adi, mwambi kampàndà wàkapweka ku mwaba kampàndà wùvwà mùkidi mwinshì mwà njila. Nènku wàkacipeta...kwimanyika kàbalù kèndè, nè kubwela mwinshì mwà mùkidi amu, kadi kwambayè nè: "Nzambi wa Bukolè bwònsò, cimenga eci ncibolè cyònsò too nè kwínshì eku." Yèyè nè: "Fikishàku mulùme yònsò, mukàjì yònsò, mwànà wa balùme anyi wa bakàjì, udi upicila pamutù pa mùkidi ewu, bwà kutwishiiwbabò kùdì Nyumà Webè." Kuyayè kangata mulwanganyi wa mvità mwîmpè, wa lulamatu, kumutèèkayè mwinshì mwà mwaba awu, bwà kusambila. Bàshààlemù, muunya nè bufuku, biikàle bàjila byàkudyà, munkaci mwà kusambila.

⁶⁷ Wàkabwela mu cimenga, nè kulòmbayè dyanyisha dyà kulòmba dibènesha ku mèèsà, kumpàlà kwà didyà dyà mundaamuunya kufidiibwadi. Yèyè nè: "Èyo."

⁶⁸ Ke kwimanayè nè kwamba nè: "Mukalenge Nzambi, wènzèku nè mulùme yònsò nè mukàjì yònsò udi usòmba ku mèèsà eku, àtwishiibwè."

⁶⁹ Nènku bààkamba, nè kufùnda ku bibèjibeji, nè: "Bantu bàvwa bafwànyine kupicila pamutù pa mùkidi awu, nè kwimanyika tùbalù twàbò mu njila, nè kwasa myadi nè kwela mbilà." "Balùme nè bakàjì bàvwa mwà kulwa ku mèèsà nè kusòmba bwà kudyà byàkudyà byàbò, kadi kubisàkila, è kwasa mwadi nè kwela mbilà nè kunyingalala."

⁷⁰ Aci's ke mùshindù wà ditàbuluja ditùdì naadi dijinga dilòlòlò edi, mwaba wùdì Nzambi ùpàtuka munkaci mwà bantu.

⁷¹ Tudi mwà kubanga disangisha, kwenza bimanyinu nè maalu à kukèma. Ndi mucimòne kaaba aka. Ntu mpàtuka, nè mîngà misangu, mu disangisha, mpofò yimòna, mpudimaci yùmvwa, bantu bàlwa bapwìpì apu bwà kubandila, bàmba nè: "Abi's mbilenga byà dikèma." Piikalà ditabuluja dijikà, kùcyèna

kàbìdì ubùùmvwà to. Mbaalùkile buludì nè: “Èè, èyowà’s, ndi ngìtabuuja aci.”

⁷² Cìdì cìmukèngela, dilòlòlò edi, kî mmuyiishi mupyamùpyà to. Cìdì cìmukèngela n’Nyumà Mwímpè, ùpátuka munkaci mwà bantu, ùbabindulula, ùbàvwija nè nzala nè nyòòtà yà bwakàne. “Bàà disànka ng’aba pàdibo nè nzala nè nyòòtà yà bwakàne, bwalu bóbò nebùùkucishiibwè.” Nànsha ciikàle penyì, bìdì bìkèngela Nyumà Mwímpè bwà kucyènza.

⁷³ Mpindyewu, mu matùkù aa pàvwà baakwidi aba... Bàvwà bafwànyine kuya nè muntu awu kuntwaku, nè pàmwàpa mwikàle munkaci mwà kudima mu budimi bwà matalà; mfùmù wa mudimu wènda ùnyùnguluka, ùmwela mfimbù nè lukodì nè: “Ambùlujaayi kwàka! Nudi nè cyà kulwijakaja nè cyòci eci’s!”

⁷⁴ Kàdi pàvwà ànu mpungi awu ùdila, muntu awu ùvwà mwà kwimansha lukàsù alu panshì, wàmba nè: “Ncyakudima kàbìdì naalù to.” Nè mfùmù wa mudimu awu, mulombodi wa bapika awu, ùvwà mukàndikìibwe bwà kumulenga kàbìdì, bwalu yèyè ùvwà mudiikàdile. Bwà cinyì? Ùvwà muumvwè luumù lwímpè. Cyanga cikaavwa cimane kubanga. Difuta dyà cibawu divwa dyenjìibwe, nè bapika bònsò bàvwà mwà kuya badishikàmine.

⁷⁵ Ndi mvùluka, mèmè mwinè, kaa, ekèlekèle, nè pangàakuumvwà luumù lwímpè alu lùlwa mu mwoyi wànyì. Bu mwànà mukesè wa balùme ngènzàmpèkààtù mulàadika pa bulàalù bwà lùpitaadi mwab’ewu, ngàngabukà kwambayè nè: “Nkukushàadile tukwàbò tusunsa túsàtù bwà kwikala nè mwoyi.” Mèmè kuumvwà cyonà cyà mu Dyulu, cyàkangambilà nè cidimu cyà cyanga cìvwa munkaci mwà kwenzeka.

⁷⁶ Ngàkiitaba Mukalenge Yesù, kusùulula myonji yònsò yà mpèkàatù, nè kwambila dyabùlù nè: “Kwèna mwà kungenzela bibì kàbìdì to, bwalu ndi mufile mwoyi wànyì kùdì Kilistò Yesù, nè kwèna mwà kungeela mfimbù kàbìdì to.” Kubangila ànu apu, mmungenze mukaaka, misangu yàbùngì. Kàdi kèna mwà kundenga to kubangila ànu piinè apu, bwalu yèyè ùdì ànu mwena mikaaka. Ndi mwà kuumvwà mfimbù wèndè wùdila nè wèla kashibà, nè bikwàbò, kàdi kabyèna nè dikwàcisha nànsha dimwè to. Bwalu, yèyè kèna mwà kumpeta to, bwalu ndi wa Mukalenge mpindyewu. Ncyà bushùwà.

⁷⁷ Mpindyewu tudi tumòna mwabilaayi ewu, paanyimà pàà yèyè mumanè kwikala mudishikàmine bwà kuya, mudishikàmine, bwà kwalukila kwèndè kumbèlu, kwalukila kùdì bananga bèndè, kwalukila kùdì mukàjèndè nè bàna. Ùvwà mudishikàmine. Kàvwà nè cyà kwikala kàbìdì mupika to.

⁷⁸ Kàdi bwalu bubì mbòbù ebu. Muntu awu yèyè kàyì muswè kwalukila to, kàdi yèyè muswè kushààla kuntwaku, dībà adi mfùmù ewu ùvwà ùlwa taàmàkàtàmàkà nè kùdiyè, wàmba nè: “Udi ànu muswè kwikala ànu mupika wanyì anyì?” “Èyowà.” Dībà adi bàvwà bàpweka nèndè ku ntempèlu, bàcyàmba

kumpàlà kwà bantu, bu bujaadiki bwà patòòke, bèèyemeja dici dyèndè ku dikunji, nè bàtwa mùsongolo, nè bàmutwà cimanyinu ku dici. Dìbà adi kàvwa mwà kwikala mudìshikàmìne to bwà kashidi. Úvwa nè cyà kwikala mwena mudimu matùkù èndè ònsò à mwoyi. Ùdi nè cyà kutùngunuka nè kukwàcila mfùmù wa bapika ewu mudimu, matùkù èndè ònsò à mwoyi, yèyè mubènge ku budìswile bwònsò dibìikila dyèndè nè mpùngà wa kushààla mudìshikàmìne awu.

⁷⁹ Mpindyewu shikàmaayi nwènù biine bîmpè, bwà katanci kakesè cyanààna. Munda mwà bidimu makùmi ànaayi bishààle ebi, mu Ètats-Unis wa Àmèrikè, mùdi dìbà dyònsò ànu Nyumà Mwîmpè ùkungula, ùkwàta mudimu munkaci mwà bantu nè mu bantu nkààyà, ùfla bimanyinu nè maalu à kukèma, nè bishimà byà mishindù yònsò. Bantu bàvwà bangàciibwe, buumusha ku diikala bandumbà, ku diikala bantu bàà masandi, nè bikwàbò, kàdi kubàvwija bantu bàà nsongo nè beena Kilistò. Kùvwa bàvwà mpofo, bapetè lùmònu lwàbò. Maci mapàte makàngùdiibwe. Cikondo cinènè cyà cyanga bwà babèedi nè beena ntàtu, aba bàvwà baswikiibwe kùdi dyabulù abu! Mu bibadi byònsò, nànsha yèyè ní ùvwa ùsaama, nànsha yèyè ní ùvwa mpofo, nànsha yèyè ní ùvwa cikalàbà, kùkaadi binunu kuvudija ku binunu byà bishimà byenzeke munkaci mwà bantu. Kùkaadi ditàbuluja kacya ànu dyàmòngana, mu maèkèleeziyà, munda mwà bidimu makùmi ànaayi bishààle ebi, dyà dibàtiiza dyà Nyumà Mwîmpè. Kàdi mbikafike mu cikondo cyà nè, bu ditùnga, nè mu kaabujimà, nè bu bantu-nkààyà, nè bu bisumbù byà èkèleeziyà, tudi baMubènge. Tudi bakwàte njila bayè nè baMubènge.

⁸⁰ Mpindyewu citupà cyàci cibi ncyà nè, balundà bàànyì, wèwè mubungàmije Nyumà Mwîmpè musangu wà mutàmbidile, dìbà adi wàmànyì kusambuka mukàlù. Udi ufika mu mùshindù wà kakùciyì kàbìdi kanyinganyinga kashààlekù bwèbè to, nènku neùtwibwè citampi mu bukalenge bwà mîdimà, muwikala kùyiku mwà kumòna Mukalenge Yesù to. Kwàkumònakù ditèkemena dyà Mwoyi to, nènku wèwè nebàkukàngilè pambèlu bwà kashidi nè kashidi. Didimwija kaayi dyà kadiyì tuseku's wè! Kaa, ndi ntèkemena nè Nyumà Mwîmpè ùdi ùciibweja mu mwoyi wèbè.

⁸¹ Nwènù bàdi biimànyìne ku mikàlu. Wèwè ukàadi mwelèle meeji, misangu yàbùngì nè: “Ndi muswè kwikala mwena Kilistò wa mudifile mu kaabujimà, bu mèmè ànu mwà kwangata dipàngadika bwà dìbà dyà kucyènza.” Kaa, mwanèètù wa balùme, mwanèètù wa bakàjì, udikù ufika ku dyumvwa nè eci cidì mwà kwikala mpùngà wa ndekeelu wuwikalàku nendè bwà kulwa nànkù anyi? Dìdì mwà kwikala dilòlò dyà ndekeelu diwikalaku mwà kupeta mpùngà wa kulwa mwena kwitabuuja mwena Kilistò. Bidi mwà kwenzeka nè, kwambwila ànu ku dilòlò edi, ùkaadi mudyombòle Mukenji wà Nzambi bwà

musangu wà ndekeelu. Dîbà adi newikalè, ku mèsù kwà Nzambì, mutwà cimanyinu mu dipàmbuka.

⁸² Nekwikalè ànu misumbà yìbìdì yà bantu mu matùkù à ndekeelu. Bùbìdì bwàbò nebìikalè mwà kulwàta cimanyishilu.

⁸³ Cimanyinu cyà Nzambì ndibàtiiza dyà Nyumà Mwîmpè, kakùyì mpatà nànsha mikesè to. Mwva muiyishè aci kî nkwanjì kwenza ntàntà to, ànu kaaba aka. Ku dikwàcisha dyà Nyumà Mwîmpè, nè Dìyì dyà Nzambì, kucijaadika nè, citampì cyà Nzambì ndibàtiiza dyà Nyumà Mwîmpè. Efèsò 4.30 ùdi wàmba nè: “Kanùbungamiji Nyumà Mwîmpè wa Nzambì to, unùdi batwibwe nendè citampì too nè ku ditùkù dyà bupikudi bwènù.” Wèwè kùyì nè Nyumà Mwîmpè to, kwèna mutwibwe citampì nànsha. Kàdi Nyumà Mwîmpè s’ke Citampì cyà Nzambì.

⁸⁴ Nè pashìishe, aci, bònsò bàvwa kabàyi batwibwe citampì kùdì Nyumà Mwîmpè abu, bààkangata cimanyinu cyà nyama wa lwonji. Nèku cimanyinu cyà nyama wa lwonji ncimanyinu cyà dipàmbuka, mbwena kwamba nè, kubènga Nyumà Mwîmpè. Nudi bamòne cìndi njinga kwamba aci anyì?

⁸⁵ Pashìishe pàdì cidimu cyà cyanga, anyì dikùbàkùbà dilwa, bwà bantu bàpeta Nyumà Mwîmpè; kàdi wèwè nè budiswilè bwònsò, ku bukolè uMudyombola, Nzambì kèna kàbìdì, anyì, kèna kàbìdì mwenzèjùbwe bwà kwakulaku neebè kàbìdì to. Dîbà adi neùtwibwè cimanyinu, bifwànyikijilu byònsò byà kale byà Dipungila Dikùlukulu abi, bidi ànu bifwànyikijilu nè mindidimbi yà Dipyadipyà. Nèku kubenga Kilibò, nè kuMudyombola, bwà nè Yèyè ùdi ùkòòkola ku ciibi cyèbè, udi mu mulongo wà njìwù wa kwikala mutùbula dicit. “Dìitabuuja didi difùma ku dyumvwa, dyumvwa dyà Dìyì dyà Nzambì.” Nèku Nzambì nèacipajè maci èbè awu, bwà kùlù kukùmbana bwà kumvwa kàbìdì to. Nèku kwàkwenza cikwàbò cintu to kutàmba kudyula Èvànjeeliyò matùkù èbè ònsò à mwoyi; nè ufwà, nè ujìmina bwà kashidi. Ncikondo kaayipu, pàdiku cikondo cyà cyanga apa, pàcidi biibi bikàngula’s wè! Nuvwakù bamanyè nè dibàtiiza dimwèdimwè dyà Nyumà Mwîmpè edi . . .

⁸⁶ Ndi munkaci mwà kulonga maalu-malonda munda mwà bidimu binaayi bishààle ebi, anyì bitaanu, bisambòmbò, pa Nyumà Mwîmpè, mumanyè nè cikondo cilwalwà kùndi kumpàlà eku mpindyewu aci, cìvwa nè cyà kulwa, bwà ngàmòna mwà kutèeka ku luseke masangisha à dyondopa bu cintu cyà kumpàlà, bwà katanci kakesè, kàdi kuyiisha Èvànjeeliyò! Ncyà bushùwà. Cintu cyà kumpàlà cìvwa cikèngelà bwà mèmè kwenza . . .

⁸⁷ Bantu bàvwa bàmba nè: “Bwà cinyì kùyì wenza *cikampàndà*? Kwèna wenza *cikansanga* bwà cinyì?”

⁸⁸ Cintu cyà kumpàlà cìvwa cikèngelà bwà mèmè kwenza nè dipà dyà kùdì Nzambì adi, cìvwa nkupeta myoyi yà bantu. Mèmè nciyi mupete myoyi yàbò to, kabàvwa mwà kutèeleja nànsha. Mpindyewu Nzambì mmucishindike, nè mpindyewu

mbangiitabùùje. Mbamòne bintu bikaadi byambiibwe byenzeke, ku mwákù nè ku mwákù. Bààkamòna bukolè bwà Nzambi bùkwàta mudimu nè bwènta ànu menemene. Mpindyewu cyùdì wèwè wamba aci, nebàcìtabùùjè. Mpindyewu cintu cyà kumpàlà cìvwà cìkèngela bwà mèmè kujandula, cìvwà cìmvwà munkaci mwà kwakulapù aci, bwalu Nzambi neàngoomèkèlè bujitu bwàci ku Ditùkù dyà Cilumbulwidi. Aci's ncilelèlà.

⁸⁹ Dibàtiiza dyà Nyumà Mwîmpè dyàkapòna, musangu wà kumpàlà kacya ku Mpenta, mu Russie, kùkaadi bidimu lukàmà mpindyewu. Ncyà bushùwà. Aci's mmaalu-malonda. Nènkù bàvwa nè dibàtiiza dyà Nyumà Mwîmpè, nè benzè bimanyinu nè maalu à kukèma, kùkaadi bidimu lukàmà; kàdi kuMubèngabò, bu dítunga, nè kuMudyombolabò. Nènkù pààkenzabo nànkù, mbashààle mpindyewu balwishì bàà Nzambi, balwishì bàà butèndeleeedi, nè balwè ba-communistes, bàà mashika, bàà mwoyi wà mbazù. Wèwè kùyi muswè kutèeleja Nzambi to, Yèyè neàkupèèshè nyumà wìkala mwà kukupìisha, ukùdimunyiibwa ku meeji moonèke, bwà kwitabuujà mashimi nè kupìishiiibwa ku ôwò. Ke mwaba wùdì Russie mwimàne dilòòlò edi, mupìishiiibwe ku mèsù kwà Nzambi, bwalu wàkapangila kwakidila mukenji wà cyanga wà dibàtiiza dyà Nyumà Mwîmpè. Mbakùdimuna ku meeji moonèke. Bàvwa biitabùùje mashimi, nè mbapìishiiibwe ku cyòci aci, ku mèsù kwà Nzambi.

⁹⁰ Mwaba wàkalondà wàkapònaYe mùvwa mmu Turquie, kàdi beena Turquie bààkaMubènga. Nè kupoopela pa nkùrusè, nè kwela mu biinà, nè bikwàbò, nè myelè yà mvità myela muulu mùshindù ewu, baa Arméniens abu, nè bikwàbò, kàdi kubàshebeya ku nkàmà. Kàdi tàngilààyi mwaba wùdì Turquie ùsanganyiiibwa dilòòlò edi. Bwèndè mbutùùke's!

⁹¹ Mpindyewu, mwanèètù wanyì, Àmèrikè ewu ùvwa nè bidimu makùmi ànaayi byà diyiisha dyà cyena-kale dyà bàpostòlò, cidimu cyà cyanga. Kàdi bóbò kabàyi baswè kuMwakidila bu dítungà to, nènkù ndi ncìina nè nkwèpi kwàlwàbo kubènga kucyènta, pashiiishe bààkashààla pambèlu, mu mifitù, mu dipàmbuka dikolè. Màngumba ètù ònsò, kaèna nè bwalu to, kàdi, mwanèètù, Nzambi kàtu ùtàngila màngumba to. Yèyè ùtu ùtàngila bantu-nkààya. Bwena Kilistò kí ndingumba to. Bwena Kilistò mmwoyi ùdì naawù muntu nkààya. Amen.

⁹² Dìngà ditùkù, EMU MMÙDÌ NYUMÀ MWÎMPÈ WÀMBA wàkwila mu Dìyì dyà Nzambi, nè: "Àmèrikè ùdì mu kaabujimà, munkaci mwà kubènga Nzambi, nè neàkidilè cimanyinu cyà nyama wa lwonji bilondèshile Bwàkabuulwibwà nshapità wa 13." Nènkù tudi twenda tubwelamù. Nzambi kèna mwà kulekelakù dítunga nànsha dìmwe. . .

⁹³ Nzambi kàtu ùsunguluja dítunga to. Yèyè kàtu usunguluja bantu to. Yèyè mmuswè muntu kanà yònsò udi muswè awu.

Nènku ditùnga òmwèpelè dyòdi ditante nè dyenze cyònsò eci nè diimàne kamùngulù, bukalenge abu's nebùshààla kashidi.

⁹⁴ Kàdi bukalenge bwònsò bwà pa buloba nebùshimbudiibwè ku dilwa dyà Dibwe didi ditùuke ku mukùna, kakùyì dikwàcisha dyà byanza to, diikalà mwà kushimbula makalenge ónsò à buloba bujimà kuàsùnsulula tupese. Nè Kilistò neàlombòle nè neàkòòkeshè, nè bukòòkeshi Bwèndè kabwàkwikala nè ndekeelu nànsha. “Dìna Dyèndè nedibùkidiibwè nè Mubedyanganyi, Mfùmù wa Ditalala, Nzambi wa bukòlè, Taatù wa kashidi. Nè bukalenge nebùwikalè pa makaaya Èndè, nè Bukalenge abu kabwàkwikala nè ndekeelu to.” Ke Bukalenge bwà Nzambi bwikala mwà kulwa nè bukòlè nè dileeja patòòkè, kàdi byònsò bìdi bishààle byà buloba abi nebùshimbudiibwe nè bisùnsudiibwe mu tupese. NebaBùbèngè. Matùnga's mmaBùbènge, èkèleeziyà mmiBùbènge, bantu pàà nkààyà mbaBùbènge; bwà Nzambi wàmòna mwà kulumbulwisha matùnga, Ùdi mwà kulumbulwisha maèkèleeziyà, Ùdi mwà kulumbulwisha bantu nkààyà. Bwalu, muntu udi ulwa ku Bulelèlè, kàdi upangila bwà kwendela mu Bulelèlè, dìbà adi yèyè ùdi, bilondèshile Mifundu, yèyè mmupendè Nzambi, anyi mubènge, Nyumà Mwímpè wa Nzambi, nè mmupicìshe Ditùkù dyà Bupikudi.

⁹⁵ Balundà bàanyì, panùdi nwendakana kaaba aka, nè bintu binùdi nupeta . . . Tudi tulwàta bilàmbà bímpè, bilàmbà bitàmbe bwímpè. Bantu bàdi balwàte bímpè menemene ku bònsò pa buloba bujimà mbeena Àmèrikè. Bantu bàdi badiishibwe bímpè menemene ku bònsò pa buloba bujimà mbeena Àmèrikè. Bàdi bèndesha tùshinyi twà tutàmbe bwímpè mu buloba bujimà. Bàdi nè mfrangà mipite mitàmbe yà muntu kanà yònsò ewu pa buloba bujimà apa. Ncyà bushùwà. Tudi nè byònsò byà bitàmbe bwímpè ku bònsò bwà buloba bujimà. Tudi nè yimwè yà ku èkèleeziyà mitàmbe bwímpè ku yònsò bwà buloba bujimà. Tudi nè bàmwè bantu bàà batàmbe bwímpè pa buloba bujimà. Kàdi nànsha nànkù, mu biinè byònsò abi, ditùnga mu kaabujimà, s'jàdi munkaci mwà kutàpuluka ku kakesè ku kakesè nè Nzambi, bwalu tudi bacitèèkèle pa bantu-nkààyà, tudi bacitèèkèle pa màngumba, tudi bacitèèkèle pa matùnga.

⁹⁶ Mwab'ewu ànu àbidi àdi pànshì aa, mèmè kukonka muntu kampàndà, mèmè nè: “Udi mwena Kilistò anyi?”

⁹⁷ Yèyè nè: “Ndi muswè bwà ùmwè nè mèmè ndi mwena Àmèrikè. Ndi wa mu ditùnga dyà beena Kilistò.” Èè, aci kacyèna nè cidici cyùmwija nànsha cimwè to.

Mwànà wa bakàji kampàndà, mèmè nè: “Udi mwena Kilistò anyi?”

⁹⁸ Kwambayè nè: “Ndi muswè bwà ùmwè nè, nsongàalùmè wa yààyà, ntu nteemesha kàndeyi bufùkù nè bufùkù bwònsò ebu.”

⁹⁹ Bûngì bwà tûndeyi bûdì wuteemesha bûdì bûshintulula cinyi's? Bîdì bîshintulula cinyi nànsha wêwê musòmbèlè mu ditûnga edi? Nànsha wêwê wa mu èkèleeziyà kaayi bîdì bîshintulula cinyi? “Muntu yêyè kàyì mulediibwe cyàkàbìdì ku Nyumà wa Nzambì to, kààkumònakù Bukalenge bwà Nzambì to.” Aci cívwa ncyena-bwalu cyà didimwija cyà Mukalenge wetù Yesù Kilistò.

¹⁰⁰ Balundà bàànyì, kanwèna bamanyè mûndì munûnangè to. Kanwèna nufika ku dyumvwa nè pândì. . . nè ncyèna nteeta bwà kunùtândisha ànu nè mbwalu ndi mwimàne mu cyambilu to; aci's nkunùmwènenà's.

¹⁰¹ Kàdì cîndì nnwàmbila, dilòòlò edi ncyà nè: Ikàlaayi badimwijiibwe kùdì Èvànjeeliyò! Nyeemènaayi kùdì Kilistò! Tèèkaayi bintu byònsò ku luseke! Kwîndidi Màndèmwàzele Jones to, kwîndidi bwà kubangilabì mu èkèleeziyà to, bibangishe ànu mu wêwê mwinè, mpindyewu mene. Bwalu dîbà ndifwànyine kulwa didì Nzambì mufwànyine kukufunkwina bwà kwikala mupika matùkù èbè ònsò à mwoyi, ku mpèkaatù ùdì muswikiiibwekù ntàntà mule awu. Nànsha bilòmba cinyi!

¹⁰² Muntu kampàndà ùvwa wàmba, ànu àbìdì àdì panshì aa, wàmba nè: “Kàdì, Mwanèètù Branham!” Muntu ewu ngwa meeji matòòke à menemene, cívwa muntu awu musòmbèlemù aci, mmusòmbèle mu mpèkaatù. “Kaa,” yêyè nè, “ndi nè meeji matòòke. Ndi ngiitabuuja Mukalenge Yesù Kilistò.”

¹⁰³ Mémè nè: “Wêwè nè meeji matòòke, dîbà adi jaadikà nè udi nè meeji matòòke. Lekèlè mpèkaatù ùdì musòmbèlemù awu.”

“Kaa,” mwàkambàye, “udi umòna's, kùdì byàbûngì be mu bwalu abu.”

Mémè nè: “Pàànyì's mvwa ndyambidila nè uvwa nè meeji matòòke.”

¹⁰⁴ Wêwè udi wamba nè: “Èè, s'ndi nè *cikampàndà* cyà dyenza. Ndi nè *cikansanga* cyà dyenza.” Cintu cyà mushinga mukolè mutàmbe cyùdiku mwà kwenza nkulwa kùdì Yesù Kilistò, cyùdì nè cyà kwenza nànsha ciikàle cinyi. Ncinyi cikwàbò cidi nè mushinga kutàmba—kutàmba kwikala mulediibwe cyàkàbìdì?

¹⁰⁵ Yònsò wa kunùdì mmumanyè nè dîngà ditùkù newikalè kabalùbalù kàà mutù nè mushikì wà mifùbà myadija mwînshì mwà dîmwè dyà ku diima didì mwab'ewu edi. Bulelèlè ànu mùdibì nè nudi basòmbe mwab'ewu dilòòlò edi emu, ke kunùyaaya batàngile. Ncyà bushùwà. Bìvwa bikèngela bwà wêwè kwikala nè meeji matòòke à mùshindù kaayi dîbà adi's? Nudi bumvwè cîndì muswè kwamba aci anyi? Pàmwàpa udi mufwànyine kubanga mu dîbà dijima kutwàdijila ànu ku mpindyewu. Dîbà edi cidimu cìlwalwà eci, kùdì mwà kwikala kakùyì nànsha katùpà kàà musunya pa mifùbà yèbè to, mu ngondo dikùmi nè yìbìdì yìdì yìlondà eyi. Kùdì mwà kwikala kakùyìku nànsha kapese kàà mwoyi mu mubidi wèbè to, mu

tusunsa makùmi àbìdì nè tùtaanu tùdì tùlondà etu. Nè pashìishe kubangila ànu ku cikondo aci, too nè pààjikà bikondo byà kabiyi nshìikidilu, kwàdyàkwikalakù nànsha. Mu ngiikàdìlù úyaaya awu, ke mu ngiikàdìlù uwikala bwà kashidi.

¹⁰⁶ Pa nàнку wèwè mwikàle wa civùmvù, mwanèètù, awu's mmwaba wà njìwù wùdì mufwànyine kwimana, mmu ngiikàdìlù wa civùmvù. Yesù wàkamba nè: "Anyi ikàlà ku luuya anyi ikàlà ku mashika. Anyi ikàlà Bwànyì, nè mwoyi wèbè wònsò, anyi ikàlà mulwishi Wanyì." Pawikàlà ànu nè nsòmbelu mwìmpè, kàadyàkubadiibwakù to. Mikùsù yà bwakàne bwèbè sungasunga ayi kayàakushàalakù miimàne mu Ditùkù dyà Cilumbulwidi to. Ncyà bushùwà.

¹⁰⁷ Wèwè udi wamba nè: "Èè, mèmè's ndi wa mu èkèleeziyà." Aci kacyèna naaCì bwalu to. Ndi ngiitabuuja nè bìvwa bikèngela bwà wèwè kwikala wa mu èkèleeziyà, abi's bìdì ànu bìmpè, kàdi aci kacyèna nè bwalu nè lupàndu to.

¹⁰⁸ Ànu mûngàmbì mu dindà emu nè, muntu awu wàkaya myaba yònsò, úteeta bwà kupeta Yesù Kilistò; Yèyè's úkaavwa mu mwoyi wèndè. Bintu byàkenzàye abi, dyela dyà mbilà nè dyakula dyà mu myakulu, nè bikwàbò, bintu abi bìdì ànu bìmpè, kàdi abi's mbyambiibwà byà Kilistò mwikàlemù dyàmbedi. Nwamònu anyi? Udi nè cyà kwanji kupeta Kilistò *kaaba aka* dyàmbedi, pashìishe bintu abi nebyènzeke. Kàdi udi mwà kwenza nàнку, kùyi nè Kilistò to, nènku dîbà adi mmu lutàtù lwà mùshindù kaayi mùdì usanganyiiibwamù?

¹⁰⁹ Mpindyewu, mèmè's nkààdiku mumòne bampàngaanù bèèla mbilà. Ncyà bushùwà. Nkààdikù mumòne bantu bànyùnguluka bènza bintu byà mmwènekulu wa lukutukutu bu nàнку awu, mu mùshindù wà nè wèwè mufwànyine, udi mwà kwitabuuja cintu kanà cyònsò. Bàpulula munyanga ku mufuku kampàndà, mùshindù *awu*, bàsòkapù cintu kampàndà, nènku munyanga awu wìmana kuulu mululàme mu kapeepà. Bàngata nyòka munène wa lwàsà, nè yèyè munkaci mwà kusumangana, nànsha mwikàle nè mènù anyi kàyi naawù to; bààdija mukùsu mwaba awu, kàdi numòna mènù èndè awu mu mukùsu amu. Bànyùnguluka mwaba awu, nè bàmwimbila kaamùjiki kakesè, nè bìmba musambu, nè bamujìngila mu nshìngù. Nyòka wa lwàsa awu ànu kacya wàmutàngila, wènza bu ùdi ùswa kumusùma, kàdi pashìishe wàlukila cyànyimà. Kùseemenyi pabwìpì nendè to; yèyè's mmufwànyine kukushebeya.

¹¹⁰ Nè nkaadi mubàmòne biimana kuntu kwàka nè bèndela mu mèkù à kapyà, pàvwà makàla awu àlàkuka nè kapyà. Bàvùùla byàkadibò balwàte, bèndela ànu buludi munkaci mwà makàlà à kapyà awu kaàyi àbènzela bwalu nànsha bùmwe to, kabàyi bùmvwà busaami nànsha bùmwe to. Bàbwela mu dijìmbà dinène, dyule tètè nè bìlàngilàngì, bikòsa tupese tupese, bikenye ku mènù mùshindù *awu*; banyeemena lubilu

bàtùmpika bikolè bàdyèlamù nè bàlàalapù nè bàbùngulukamu misangu nè misangu, nè bàjuukapù, kabàyi kapùtā pambidi nānsha kàà mafi to; bàtùpikā bàlòpokamù. Aci's ndiitabuuja, kàdi, mwanèètù, aci kī ndupāndu nānsha. To, mukalenge. Kaa, byā mùshindù awu, mmishindù yā budimù yidì naayi dyabulù bwā kuseeswisha bantu.

¹¹¹ Lupāndu mbwalu bwā muntu-nkāàya nè Nzambi wa Bukolè bwōnsò, ku Yesù Kilistò Mukalenge.

¹¹² Kaa, cidi cìtùkèngelā dilòlòlò edi, balundā bàànyì, ndimwè dyā ku masangisha ā cyena-kale atùvwā twenza kale wāwa kùkaadi bidimu awu, bwā kutwā eku nè eku kwā ditunga dijimā. Mùvwā bantu bàalukila ku mààbò, bàlongolola nzùbu yābò, bàpātula bi—bintu bibi mu nzùbu yābò, bìimanyika lukutukutu lwōnsò mu nzùbù mwābò. Nzùbu nè nzùbu yōnsò, bàvwā bàmwālūja mu njila mujaalāme. Nè bàlekela lwonji lwābò. Bàlekela diibila dyābò. Bàlekela mashimi ààbò. Bàsòmba nsòmbelu wa meeji matòòke nè wa didipòpa muntu nè mukwèndè; bàsòmba mùtùbi bìkèngela bwā beena Kilistò kusòmbabò. Ke mùshindù wā ntèndeleeu awu's.

¹¹³ Nènkù, leelù ewu, kùdì...ntèndeleeu wa mùshindù wùmwèwùmwè wutùdì nendè awu, kupanduluka nè kupanduluka mu mùshindù wā nè wàkalwa citebelu cyā bikāsa byā Hollywood, ànu bu nānkù's. Mpindyewu, s'nudi bamanyè nè aci mbulelèlā. Nènkù tuyāàya mu mwaba kampāndā, tutèekamù musùmbā munène wā beena mijiki, nè twimbisha mijiki, nè kwenza bintu byā lukutukutu, kàdi kwenza bu, tucinka mutùdì beena Kilistò. Kàdi nda kùdìbo nè ùdyatàku ànu umwe pa dikāsā kasangu kāmwpèlè, kàdi ùmonè ciwàpeta. Nwamònu anyi?

¹¹⁴ Bwena Kilistò bùdi mwoyi mule, bwîmpè, bupòle, musàngèelu, lutùlù. Ncyā bushùwā anyi? “Kilistò, pàakamupendābo, Yèyè kàakaluja cipendu to.” Ncyā bushùwā anyi? Bwena Kilistò nnsòmbelu udi nendè muntu. Ndilabula dyā muntu sungasunga. Kī. . .

¹¹⁵ Kàdi bàmwè bàdi bàmba nè: “Pa nānkù mulùmyānā ewu, ndi mumanyè nè muntu ewu ùtu wènzā cikampāndā. Ndi mumanyè nè yèyè ùdi mwā—ùdi mwā kusambidila babèèdì nè bōbò bàsàngala.” Aci kacýena cyùmvwija nè yèyè mmwena Kilistò to. Diitabuuja nedyènzè cintu kanā cyōnsò eci.

¹¹⁶ Nènkù bu nwènù ànu mwā kupicila mu mwaba awu, bu beena Kilistò, kasùmbù kèètù kakesè ku tabernacle eku, nwènù aba, bu nwènù ànu mwā kumòna mùshindù wùdì baloji balùme nè baloji bakājì abu bènza bishimā. Bushùwā, ke mùdìbo bènza.

¹¹⁷ Nènkù bàdi nè dileeja dyōnsò dyā patòòke didì bwena Kilistò bupātula adi, kàdi kabèèna mwā kwikala beena Kilistò to. Tàngilāayi nsòmbelu yābò, cidìbo bènza.

118 Bantu muntwamu bàdi mene bàshààla nè bakàji bàà bakwàbò, bènda masandi, bu ntèndeleeleu, nè bantu bàmwèbàmwè abu bàdi bènda bimanyinu nè maalu à kukèma. Kabiya mu. . .

119 Kùdi cintu cìmwèpelè cìdìbo kabàyi mwà kwenza to. Kùdi ànu cintu cìmwèpelè cìntùku nciyi mukùmbàne mwà kumòna mwàmuloopò anyi ní ncinyi cyènda to. Bàdi mwà kwenza bishimà, bu mùdi kwenza nè mwonji ewu wimanyine kuulu. Bàdi mwà kunyeemena mu kapyà, kukika kapyà. Nènkù bàdi mwà kwenza bintu byà mùshindù awu. Kàdi kabèèna mwà kwondopa bantu to. Aci's ncyà pabwàci. Bàdi mwà kwela milawu pa bantu, nè màsaamà neàlwe pa bantu. Kàdi kabèèna mwà kuumusha mulawu awu, nè kubòndopa to.

120 Bìvwa mùshindù awu munda mwà cikondo cyònsò cyà Bible aci. Pàvwa Yanè nè Yambèlè bakàndàmèene Mòsà, bàvwa mwà kutwala mpùtā nè byùjā, kàdi kabàvwa mwà kubyùmusha to. Bàvwa mwà kutwala njiji nè nkùsù, kàdi kabàvwa mwà kuyùmusha to. Bwalu, Mukalenge ke Umwèpelè Udi wondopa babèèdi. Bàdi mwà kujā maja mu nyumà, nkàadi mubàmòne misangu yàbùngi. Bàdi mwà kwikala nè bilengulengu byà mishindù yònsò, kàdi kabèèna mwà kwondopa babèèdi to, anyi kabèèna mwà kwikala nè nsòmbelu wa bwena Kilistò to. Ke cintu cìmwèpelè cìdìbo kabàyi mwà kwenza ncyòci aci.

121 Nè pa nànkù cìdi cìlwa bwalu bwà muntu nkààya, nè mulùme yònsò nè mukàji yònsò, patùdi tumòna bintu byònsò byà mashimi ebi, nè Bible mmwàmbè, nè: “Nyumà yibìdi ayi neyitambè kwikala mifwànàngàne, mu matùkù à ndekeelu, mu mùshindù wà bifwànyine kuseeswisha Basungula bu nè bìvwa mwà kwenzeka.” Ncyà bushùwà. “Ba-Kilistò bàà mashimi, nyumà wa mashimi ùjuuka, ùleeja bimanyinu, useeswisha bààbùngi.” Ncyà bushùwà. Kàdi: “Mikòòkò Yànyi mmimanyè Dìyi Dyànyi. Kayààkulonda mwenyi nànsha.” Kaa, nditùkù kaayi ditùdi nè mwoyi edi's wè! Nènkù cikondo cyà cyanga cikaadi cyàmba kujika.

122 Tèelejàaku, wèwè mulundà wanyi, dilòlò edi, wèwè mwikàle kaaba aka kùyì nè Kilistò to, nè kùyì muMumanyè to. . . Mutwìshìibwe ànu menemene mu mwoyi wèbè, mutwìshìibwe bwà cyòci aci, kakùyì mpatà nànsha mikesè to nè Kilistò ùdi munda mwà mwoyi wèbè, èyo. Kàdi wèwè wamba nè: “Èè, Mwanèètù Branham, mèmè's mvwa mucibùlùke yònsò nè mudilè mwadi musangu kampàndà wùmvwà ku cyoshelu.” Kwàngacikù aci to. Wèwè udi wamba nè: “Èè, nènkwbabilè's, Mwanèètù Branham nè, mvwa—mvwa mupicile mu cikondo cimpè, musangu kampàndà. Mvwa muje maja mu Nyumà, mwaba wònsò awu.” Kwàngacikù aci to. Nwamònu anyi? Wèwè udi wamba nè: “Èè, mèmè's mvwa musambidile muntu kampàndà, musangu kampàndà, wàkasàngala.” Kwàngacikù aci to.

¹²³ Cintu cidi cikèngela bwà wêwê kwangata, nkumanya nè pàdi Kilistò munda mwà mwoyi wèbè, pààlwà mateeta manène nè ntàtu, Yêyè ùcidi ànu wa kalolo kùdi. Udi wenda ànu mùshindù wùmwèwùmwè awu. Bintu byònsò byòbì byènda bibì, nè muntu yònsò mukubenge, nè bintu byònsò bikùdimùke ewu mùshindù, uciidi ànu nè kalolo nè mulenga. Mbimpè. Tùngunukà ànu nè kuya. “Nènku wêwè, nyumà webè, udi ufila bujaadiki pàmwè nè Nyumà Wendè nè, nudi bàna bàà balùmè nè bàà bakàji bàà Nzambi.” Aci cyòci kaciyi cyèza cyona cijaalàme mu musùukà wèbè, dilòlòlò edi to, mulundà wanyì, katwikadikù bakàngila pambèlu pàà Bukalenge bwà Nzambi nànsha. Tubwelàayi mu Bukalenge bwà Nzambi.

¹²⁴ Nènku pàdi ànu muntu ùtwibwa cimanyinu mu Bukalenge bwà Nzambi, yêyè mmutwibwe citampì too nè ku ndekeelu kwà lwendu lwèndè. “Kanùbungamiji Nyumà Mwimpè wa Nzambi to, unùdi batwibwe nendè citampì too nè ku Ditùkù dyà Bupikudi bwènù.”

¹²⁵ Mpindyewu, tudi nè cilèlè cyà cyena-kale cyà dibìikila ku cyoshelu, kutwàla bantu ku cyoshelu. Nzambi àtumbishiibwè bwà bwalu abu. Aci's ncintu cimpè cyà cyena-kale citù èkèleeziyà wa ba-Méthodistes mubangè kùkaadi bidimu. Nènku cìvwa nè. . . Cìvwa cimpè; cìcidi ànu cimpè leelù ewu.

¹²⁶ Kàdi kabyèna nè musinga bwà wêwè kulwa ku cyoshelu bwà kushààla mwena Kilistò to. Kabàvwaku naaci mu matùkù à Bible to. Bàvwa ànu bàbàbala bu beena kwitabuuja. Kabààkenzakù dibìikila dyà ku cyoshelu to, ntànta yònsò, mu cikondo cya bàpostòlò, kakùvwa mabìikila à ku cyoshelu to. Bààkamba nè: “Bùngì bwònsò bwà bààkiitabuuja abu bààkabàtijiibwa.” Ncyà bushùwà anyi? Bààkalwa beena kwitabuuja.

¹²⁷ Paùdi mutwìshìibwe mu kantu nè kantu nè Yesù Kilistò m'Mwànà wa Nzambi, nè mu mwoyi wèbè amu, mpindyewu, kì mmu didìfwànyikijila dyèbè adi to, kàdi, mu mwoyi wèbè, Cintu kampàndà cijikula mwaba awu, cyàmba nè: “Mpindyewu ndi musùngidiibwe,” ke cyònsò cidi cikukèngela, mwaba awu mene, mwanèètù. Cijikùlà patòòke, nè lekèlè mèyì èbè àpatukè. Nènku pashìishe tàngilà; tàngilà nsòmbelu webè kubangila ànu apu. Ànu mùdi ditalà kadiyì mwà kukwàma mpoopu to, nànsha muntu awu kèna mwà kukwàma mamuma mabì to. Nebikengele bwà kukwàmayè mamuma mimpè.

¹²⁸ Yesù wàkamba nè: “Ewu udi utèèleja Méyì Àànyì, nè wìtabuuja Ewu udi muNtùme, ùdi nè Mwoyi wà kashidi, nè kààkupicila mu dipiishiiibwa to; kàdi mmumùke ku lufù muyè ku Mwoyi.” Mbwalu udi wìtabuuja, kì nkudìfwànyikijila to, kàdi udi uCìitabuuja. Cidi cilwa meeji mu mwoyi wèbè. Cintu cidi cìlondà, wêwè kuCìjikula patòòke bu ditonda. “Ewu wàNjikula kumpàlà kwà bantu awu, Mèmè nèmмуjikulè kumpàlà kwà

Taatù Wanyì nè Banjèlò bàà cijila.” Dîbà adi cintu kampàndà cidi cyèla lwongò. Aci’s mbulelèlà.

¹²⁹ Kàdi cyàkatùlongeshàbò, mulundà wanyì, ncitwelè pambèlù pàà mulongo. Tudi balongèshiibwe, ba-Méthodistes mbalongèshiibwe nànkù, ku cibangidilu, bààkamba nè: “Mwanèètù, pààkafikabo mu mùshindù wà bafwànyine kwela mbilà, bàvwa nè dijidiibwa, bàvwa bamanè kufika.” Kàdi, nudi bafikè ku dijandula nè, kabyàkakùmbana bimpè menemene to. Ncyà bushùwà.

¹³⁰ Pàvwà ba-Nazaréens mwà kwela mbilà, nè kwela byanza byàbò muulu, kunyeemakanangana babànda bàpwèka nè kajila, bààkamba nè: “Ke Cyôci aci.” Nè bààbùngì bàà kùdìbo kwelabò mbilà bànyeemakanangana babànda bapwèka eku nè eku kwà kajila, bàpàtuka kàdi biikàle nè nsòmbelu wa mùshindù kanà wònsò nàka, nànkù’s bàvwa bamanyè nè kacivwa Cyôci to.

¹³¹ Mpenta wàkalwa, pààkabangà Nzambi kwalujulula mapà, kùdì èkèleeziyà, kubangabò kwakula mu myakulu. Kwambabò nè: “Ke Cyôci eci. Cidi naaCì mpindyewu. Tudi bònsò bashikàme.” Kàdi kujandulabò nè kabàvwa Nendè to. Ncyà bushùwà. Bantu bààkula mu myakulu nè biikale nè nsòmbelu yà mùshindù kanà wònsò.

¹³² Mwanèètù, cìdiku ncyà nè, ikàlà mutwìshiibwe! Mpindyewu, dyela dyà mbilà didi ànu dimpè. Mémè ndi ngiitabuuja dijidiibwa; èyowà’s, mukalenge, kì ndyànyì mémè to, kàdi Dyèndè Yèyè. Nwamònu anyi? Ncyà bushùwà. Kì ncijila cyànyì mémè to, kàdi Cyèndè Yèyè. PàdiYe, Nyumà Mwímpè, ùtèeka cijila Cyèndè munda emu, ncijila Cyèndè, kì ncyànyì mémè to. Mémè ndi ngenzàmpèkààtù, kàdi Yèyè ùdi Mukalenge.

¹³³ Mpindyewu, mémè ndi ngiitabuuja dijidiibwa, ngiitabuuja dyela dyà mbilà, ngiitabuuja nè muntu udi mulediibwe cyàkàbidi neàfilè dilleja dyà patòòke dyà mùshindù kampàndà. Ncyà bushùwà. Mémè ntu ngiitabuuja dyakula dyà mu myakulu. Ntu ngiitabuuja dyandamuna dyà myakulu. Ntu ngiitabuuja dyondopa dyà babèèdi. Mémè ntu ngiitabuuja dyamba dyà cipròfètà. Ntu ngiitabuuja dyanza dyà bishimà. Kàdi bintu byònsò abi bìdi cintu kampàndà cidi cìlondà paanyimà pàà wèwè mumanè kupeta Mukalenge Yesù Kilistò.

¹³⁴ Citùvwà tuteeta kwamba nè: “Pàdiye wèla mbilà, ùdi Nendè. Pàdiye wàmba cipròfètà, ùdi Nendè.” Kàdi aci kì ncidiye naaci to. Kupòòla cimuma cyà pomme ku mucì, kì mbwena kwamba nè wèwè udi nè mucì awu to. Nwamònu anyi? Wèwè udi nè cyambiibwà cyà mucì awu. Nènkù ke cyàkakèbà lutàtù ncyôci aci. Kàdi pàdiku ànu Kilistò uboba musangu wùmwe munda mwà mwoyi, bikwàbò bintu byònsò ebi bìdi ànu bìdyènzekela bu pa mukàbà.

¹³⁵ Ànu mùdibi mpindyewu nè muvù wà mashika ùdi pabwîpi. Micì yònsò neyipòòpokè mabèji àayi pa kuumusha lusànga.

Lwôlù nelùlamè mabèji àlù. Pàdi muvù wà bintu bitòloka wùlwa, ôwò àkaadi mabèji à kale mafwè. Kabyàkukukèngela bwà kupàtuka bwà kupòòpola mabèji awu bwà mapyamàpyà awu kupàtukawu nànsha. Lekèlè wèwè ànu mwoyi mupyamàpyà wùbande, nènku à kale awu àdi àpòòpoka nè mapyamàpyà àsasa.

Ke mùshindù awu wùdibi nè bwena Kilistò.

¹³⁶ Bwà kwakidila Yesù Kilistò, kèna . . . Mwawa muumvwè bantu bàmba nè: “Èè, butùmbi kùdi Nzambi’s wè, mèmè mwawa mwakùlavi mwedi wa milawu musangu kampàndà. Mwawa mwà kwela muntu bulàkù kumutùùla nè cifulu ku mutù. Nènku ndi mulekèle bulàkù, ndi mumanyè nè ndi mwena Kilistò.” To, kwèna mwena Kilistò, ku aci to. To, mukalenge. “Musangu kampàndà mwawa nnwà maalà, kàdi ndi mulekèle kunwà maalà.” Aci’s ncintu cimpè. Kàdi aci’s ncintu cyà nsòmbelu mulenga, cyà mùdi wèwè mwimànyike aci’s.

¹³⁷ Kàdi kwakidila Yesù Kilistò nkwaqidila Mupèrsònà Wèndè mu mwoyi wèbè. Cìdi cikufikisha ku difwà ku bintu byà pa buloba, nè Kilistò mmusòmbèle munda mwèbè. Nwamònu anyi? Kakùyì mpatà to udi mufwànyine kulekela dinwà dyà maalà kàdi kùyì ànu mwena Kilistò to. Udi mufwànyine kulama Mèyi matùma Ònsò Dikumi kàdi kùyì ànu mwena Kilistò to. Bwalu, bu Mèyi matùma Dikumi awu mafwànyine kukusùngila, kabivwa mwà kukèngela bwà Yesù kufwà to. Kàdi Yesù wàkafwà bwà Wàmòna mwà kukupèèsha Mwoyi wà kashidi. Nènku’s ke cìdiku aci, n’Nyumà Mwìmpè mwikàle nè mwoyi munda mwèbè; kì ndilama dyà mikenji anyi dyenza dyà bintu, anyi cintu kampàndà cyà mùshindù awu nànsha. Abi’s mbyenzedi’s. “Kì nku byenzedi kunùdi basùngidìibwe to; kàdi ku ngàsà nkunùdi basùngidìibwe, ku diitabuuja.”

¹³⁸ Dìbà adi, munda mwà mwoyi wèbè, wèwè mwakidile Mukalenge Yesù, udi mu ditalala Nendè. Tàngila paanyimà, nsòmbelu webè. Ndi nnwàmbila mùshindù wa beena Kilistò ùntù muswè kumòna. Pàdìbo bènda bàpweka nè mùsèèsù, bantu bàmba nè: “Mpindyewu, tàngila, udi mumòna muntu udi upweka kwàka wàwa anyi? Mpindyewu, yèyè’s mmwena Kilistò. Mèmè ncitu wa mu èkèleeziyà wendè to, kàdi, mwanèètù, yèyè’s mmwena Kilistò. Ndi nkwaqbila nè, nkàadi mumumòne pàdi myanda mimucìnte. Nudi numòna mukàji wàwa anyi? Èyowà’s, mukalenge. Èè, yèyè mmufwànyine kwikala kàyì ùmwènèka mutàmbe kumanyika munkaci mwà bakàji to, kàdi mmwena Kilistò. Ndi nkwaqbila nè, yèyè mmwena Kilistò.” Cimenga cijimà cyambè nè: “Ke mwena Kilistò wàwa.” Bòbò nebàcìmanyè. Bible mmwàmbè nè nudi batwìbwe cìtampì.

¹³⁹ Kacya nukàadikù batwè cìtampì pa cintu kampàndà anyi? Bàdi bacyàngata mùshindù ewu nè bàtwàpu cìtampì. Bàdi bàcìshindikila. Cìdi cìmweka nseke yònsò yìbìdi.

¹⁴⁰ Bādi bākumòna ulwa, nè bākumòna wenda uya. Ncyà bushùwà anyi? Wèwè udi mwena Kilistò, ku ntwàdijilu too nè ku ndekeelu, mutwibwe citampì kùdi Nyumà wa Nzambì. Mbamanyè ciwàkadi. Ncyà bushùwà. Ndishindikila, ditwà dyà cimanyinu, ditwà dyà citampì. Aci's mbulelèlè ànu bwà menemene ebu. Mpindyewu, ke díbà dyùdi mutwibwe citampì mu Bukalenge bwà Nzambì ndyòdi adi.

¹⁴¹ Piikalà dibèji adi dikaadikù ditwibwe citampì kacya bilondeshile mikenji, mujaadiki wa mikàndà mitwà byàlā patòòke, nè dīnā dyèndè difùndapù, cidi cìlonda mikenji pàdici ànu dibèji apu's, mwanèètù. Ncyà bushùwà. Mbulelèlè anyi?

¹⁴² Nènku muntu yèyè ànu mulediibwe kùdi Nyumà wa Nzambì, kaciyi diitabuuja dyà budingibudingi to kàdi mûle bulelèlè tètè nè Nyumà wa Nzambì, Yèyè mmumutwilemu citampì too nè ku Ditùkù dyà buipikudi bwèndè. Yèyè neikalè bu Kilistò, leelù ewu; neikalè bu Kilistò, màalabà; neikalè bu Kilistò, ditùkù dyàlondà. Mu mateeta, ùdi bu Kilistò; mu ntātu, yèyè ùdi bu Kilistò; mu nzala, yèyè ùdi bu Kilistò; mu disànka, yèyè ùdi bu Kilistò. Myaba yònsò nudi numumòna mulùme anyi mukàji, ùdi bu Kilistò, bwalu mmutwibwe citampì kùdi Nyumà Mwîmpè. Nudi bamòne cìndi njinga kwamba aci anyi? Aci kí n'nyumà webè to.

¹⁴³ Mwanèètù wa balùme, mwanèètù wa bakàji, lekèlā kunàya nè Nzambì ntàntā mupite bule to, bwalu cikondo eci ncifwànyine kulwa pàdi cikondo cyà cyanga cìpìcila ku ciibi cyèbè. Díbà adi bàyaaya neebè nè ku dikunji dyà dyabùlù, pashiishe bàdi bākutùbula diti nènku kùcyèna kàbìdi mwà kuumvwa Èvànjeeliyò wa butùmbi awu to. “Udi uswa kwamba cinyi?” Kwàkumona mushinga Wèndè to. Nudi bamanyè cidi dipenda dyà Nyumà Mwîmpè nè ncinyi anyi? NkuMubènga. Ncyà bushùwà.

¹⁴⁴ Ndíbà kaayi didìbo bàpenda Nyumà Mwîmpè? Pààkabèngàbo Yesù Kilistò, bààkaMubiikila nè Beelèzèbùlā. Nènku byenzedi mene bìvwàYe wènza abi, kwambabò nè: “Wèwè udi ucyènza ku bukòkeshi bwà Beelèzèbùlā.” Yesù wàkambila bantu, nè, cìvwàbo benzè aci's. Kabàvwa baMwitàbùje to.

¹⁴⁵ Kàdi muntu yèyè ùbènga kwitabuuja Bulelèlè pàdi Bulelèlè buleejiibwa kùdiye, kàdi ùbènga bwà kuBwitabuuja, díbà adi aci cidi cìbùjikija. Ncyà bushùwà.

¹⁴⁶ Pa nànkù wèwè kùyì mumanyè Mukalenge dilòòlò edi to, kutàmba ànu dilabula dikesè dyùdi mwenzè adi. Wèwè kùyì mumanyè Mukalenge bu Musungidi mulenga, wa musàngèelu, wa dinanga; kwèna muswè kwenza nànkù anyi, dilòòlò edi, mpindyewu mene? Kabyèna bikèngela bwà wèwè kulwa ku cyoshelu to; udi mwà kulwa pawikalà muswè. Kàdi pawikalà kùyì muMumanyè to . . .

¹⁴⁷ Ntèèlèjaayikù katanci kakesè cyanaàna, pìikalàbi nè ndi mupetè luse ku mèsu kwènù, bu mwanèènu wa balùme, nwènù nungitabuujà nè ndi musadidi Wendè. Mpindyewu, ndi ntèèka eci ndambù cyà mèmè nkààyaanyì, kàdi ndi ncyènza bwà kiipàcilà kampànda. Nwènù nwitabuujà nè ndi muswikàkàne nè Nzambi wa Bukolè bwònsò, panwikalà nwitabuujà nànkù, ntèèlèjaayi mpindyewu. Kulekediku díbà dijuuka pa wèwè to pàdi cintu kampànda kaciyi cyele lwongò mu mwoyi wèbè to, cyà nè udi mwena Kilistò, nè udi mu ditalala nè mwena lukunà wèbè, udi mu ditalala nè Nzambi.

¹⁴⁸ “Ki bwà cinyi biikàle babingishìibwe ku diitabuujà, tudi nè ditalala nè Nzambi ku Mukalenge Yesù Kilistò.” Loomò 5.1. “Ki bwà cinyi biikàle babingishìibwe ku diitabuujà, tudi nè ditalala nè Nzambi ku Mukalenge wetù Yesù Kilistò.”

¹⁴⁹ Wèwè mwikale nè lukunà nè mutumba neebè kampànda, nè mukwàbò muntu kampànda udi mukwenzele bibi, nè muntu awu mmukwenzele bibi; pawikalà wèwè, munda mwà mwoyi wèbè, kùyi mwà kunanga muntu awu to, kwangaci dilabula adi to. Udi nè cyà kunanga aba bàdi kabàyi bakunangè. Wèwè munangè aba bàdi bakunangè, bangènzàmpèkààtù's bàtu benza cintu cìmwècìmwè aci. Kàdi wèwè udi mpindyewu, nè cyà kunanga, kí ng'ànù bwà kwenza bu nè ncyenzedi cyà butèndeleeedi to, kàdi cyà cyùmukila munda mwà mwoyi wèbè amu.

¹⁵⁰ Cìmwà munùlòmbe bwà nwènù kunsambidila, ditùkù adi aci, anyi mu dindà emu, bwànyì mèmè. Ndi ndisangana nè ndi ntàmba kudyùla bantu, mùshindù wùdi bakàji bàvwàla, nè bintu byà mùshindù awu. Ncyèna muswè kwikala nànkù to, mbibi. Mpindyewu nyèwù ncitonda, kaaba aka mene nè, ndi mupùile. Kàdi nkààdikù mumòne bambi bàpàtuka benza bintu bidì kabiyi byà mu Mifundu, ke mèmè kwamba nè: “Mpindyewu abi's mbibi.” Ndi nganyì bwà kubalumbulwisha's? Nzambi ke Mulumbulwishi wabò. Nzambi umùshèku nyumà awu kùndi. Ngìikale bu Mukalenge Yesù. Aci. . .

¹⁵¹ Nè pìikalà. . . eci ncilelèlè, mwanèètù wanyì, tèèlèjà, dīngà ditùkù, dīngà ditùkù, kwàkupetakù mpūngà wa kwikala kàbidi mu èkèleeziyà to.

¹⁵² Pàndi ngùumukà nè ngààlukila, mukàjàànyì ùdi ùngambila nè: “Udi mumanyè *Kampànda* anyi?”

“Èyowà's.”

“Uvwakù mumanyè nè mmufwè ditùkù adi anyi?”

¹⁵³ Mwab'ewu, mulundà wanyì wa kale, utùvwà banàye nendè, bu nsongààlùmè, Will Edgar King. Yèyè's nyàànaanyì, kacya ànu ncivwa mwànà mukesè. Tuvwa ànu pàmwè. Tuvwa tulààla pàmwè. Tuvwa basòmbe, tulòba pàmwè, bu bàna bakesè bàà balùme, nè twenda tukola. Kàdi pàmwà dyàmwàmwà dyà mbù. . . Nsongààlùmè, nsongààlùmè mupàyàme uvwa mwondòpiibwe musangu kampànda, dyondopa dyà kùdi

Nzambi, ùwva wènda ànu wèndakana kàdi mmufwè dyàkàmwè nè disaamà dyà mwoyi. Nganyi uvwakù mufwànyine kwikala mwelè meeji nè: “Will Edgar King”? Wipacila ku bidimu mwandamukùlù anyi dikùmi mushààdile kùndi, mupàyàme, nsongààlùmè, wipacila ku kilò makùmi mwandamukùlù nè umwe nànkù, wènda wèndakana, nè mubidi tumatuma; nsongààlùmè nè mukàji mukesè mwímpè, bàna bakesè bàsàtù anyi bànaayi, kàdi mutòkòke muyè. Ùwva musumbidyanganyi munène wa beena makàjiinyi à byàkudyà bàà ku sud kwàka. Mwanzù mulenga, nzùbu mulenga, diku dilenga, kàdi wàkangaciibwa mùshindù awu. [Mwanèètù Branham ùdi ùtuuta cishòndò—Muf.]

Mwanèètù, Nzambi . . . Musùùkà wèndè wùdi mu byanza byà Nzambi mwakàne wìkala mwà kumupèèsha cilumbulwidi cyà mùshindù mujaalàme.

¹⁵⁴ Tudi basòmbe kaaba aka, dilòlò edi. Ànu Nzambi ngudi mumanyè kutwikalà mu dindà. Mpindyewu, wèwè kùyì mu bulongàme nè Nzambi to. . . Patùdi tusambila apa, ànu mu mwoyi wèbè mpindyewu mene; kí nkùndi mèmè to, kí nkùdi bantu to, kàdi munda mwà mwoyi wèbè, kumpàlà kwà Nzambi, ambà nè: “Mukalenge Yesù, ndi ànu munkaci mwà kunàya eku nè eku. Kàdi, dilòlò edi, ndi ngùmva munda mwà mwoyi wànyì nè eci ke cikondo cindi muswè kuKwitaba mu kaabujimà bu Musùngidi wanyì. Nènku kubangila ànu ku cyôci eci, ku ngàsà Webè, nèntangilè buludì ku Kàlvariyo, nè kwenda lwendu lujaalàme lwà nsòmbelu wa bwena Kilistò.”

Tudikù mwà kusambila.

¹⁵⁵ Taatù wa mu Dyulu, Wèwè utùdi banangè nè tweyemena, bamanyè nùnkù nè, bu mwambi, mwakwidi, mfilà bintu byà nyumà kùdi bantu, mwimàne kaaba aka dilòlò edi pankaci pàà bààmwoyi nè bafwè, mumanyè nùnkù nè, dīngà ditùkù, kakùyì mpatà nànsha mikesè to, nebikengele bwà mèmè kulumbulula bwà dīyì dyònsò, ku Nkwasa wa Cilumbulwidi wa Kilistò. Pa kumòna balùme nè bakàji mu mwab’ewu, bantu balenga bàà dikèma, bafwànyine kwenza cintu kanà cyònsò cindi mufwànyine kubàlòmba bwà kwenza aci, Taatù. [Katùpà kàà mukàbà wà mèyì munda mutupù—Muf.] . . . kumòna muntu kampàndà mu lukèngelu, nè mwoyi mwímpè. Mpindyewu, Mukalenge, mbikolè, bu muntu, pàmwè naabò, bwà kutwàla mèyì à àtápangana awu, bwà nè, bàdi nè cyà kwakidila Kilistò anyi kubèngiibwa.

¹⁵⁶ Taatù, aci cidi citùfikisha ku dimanya nè ndi nè dinanga dyà kùdi Nzambi, dikezùke bwà bwalu bwàbò, kí ncintu kampàndà cidi cifwànyine kubenzela bibi to, kàdi cintu kampàndà cidi cibànange, bwà Cyendèlèlè. Nènku ndi mubàlambùle Mwan’Ebè, Mukalenge Yesù, Wìkala mwà kwimana pa kaaba kààbò ku Ditùkù dyà Cilumbulwidi awu.

¹⁵⁷ Taatù, ndi ndòmba bwà Wàkidilèku muntu nè muntu. Ncivwakù mulòmbè bwà byanza kwediibwabì muulu to. Ncivwa mudyūmvwè bwà kwenza nànkù to, kàdi mvwa muumvwè nè kùdi bààbūngì kaaba aka, Taatù, bàdi baswè kwenda pabwìpì Neebè. Mbaswè kudilekelela bôbô biinè, nè bàdi munkaci mwà kucyènza mpindyewu mene. Ku diitabuuja, ndi ncìitabuuja, Mukalenge, nè bàdi mpindyewu bàtèèka ku luseke bujitu bukesè bwònsò, bàmba nè: “Kubangila ànu ku dilòòlò edi, pa kumòna nè mwoyi ngwà citùpà cìpì menemene, nànsa bishi, kakwènamu cyà nsongomù to, ndi muswè kutùùla byònsò bìndi naabì bwà Mukalenge Yesù.” Nènku, Nzambì, enzàku nè, kuumukila ku dilòòlò edi, bèndè mùshindù awu.

¹⁵⁸ Nènku díbà adi, Taatù, swàkù bwà bantu bàmwèbàmwè abu bàlwe kaaba aka bàngatè mèèsà à Mukalenge, dilòòlò edi, mpindyewu, mubidi mucibùlùdiibwe wà Mukalenge Yesù Kilistò. Nè pashiishe tudi. . . Bôbô benzè aci nè mwoyi wà meeji matòòke, Wèwè wákamba nè Wèwè nèubàbìishè ku lufù ku Ditùkù dyà ndekeelu nè nèubàpèèshè Mwoyi wà kashidi. Enzàku bintu ebi, Taatù wa musàngèelu, bwalu tudi tulòmba nùnkù mu Dìnà dyà Yesù, Mwan’Èbè. Amen.

¹⁵⁹ Ncyàkunukonka nè mbanganyì bàdi badilàmbùle to, kàdi ndi ngèela meeji nè bààbūngì bàà kunùdi mbenzè nànkù. Nènku, mèmè mwinè, ndi mucyènzè munda mwà mwoyi wànyì nè: “Mukalenge, nguumùshèku nyumà wa didyula awu kùndi.”

¹⁶⁰ Mpindyewu, ncyèna ndyùla bantu, mwísù mwàbò to, kàdi ndi ngènzela nànkù munda mwà mwoyi wànyì. Ndi mmòna inàbànzà wènda ùpweka nè mùsèèsù, nangàngà *aci*, nè mmòna nè kì mmuvwàle bilenga byà menemene to, ndi ngàmba nè: “Aci kì ncibì anyi?” Munda mwà mwoyi wànyì; ncyèna ncyàmbila muntu mukwàbò nànsa umwe to. Ndekeelu wa byònsò, abu’s mbumutàngile, yèyè’s ùdi nè budiikadidi bwà disungula. Kèna nè bukenji bwà kucyènza to; Kilistò wàkasumba mwoyi wèndè; kàdi pàmwàpa kèna ùmvwa to.

¹⁶¹ Pa nànkù, kì mbwà mèmè kudyula to; lekèlaayi Nzambì ènzè nànkù. Pàndi mu cyambilu, nényiishè Èvànjeeliyò mu mùshindù mutámbe bwimpè wùndiku pàànyì mumanyè, nè bìdi bishààla abi nèm̀bilàmbùle Nzambì. Mukalenge ànùbènèshè, balundà bàànyì.

¹⁶² Mpindyewu netwikalè mwà kwenza mudimu wà mèèsà à Mukalenge, ànu mu tusunsa tukesè cyanààna emu. Mbanganyì bàdi biitabuuja mèèsà à Mukalenge? [Disangisha didi dyàmba nè: “Amen.”—Muf.] Twasàkidilaayi. Ke cyàkatùlòmbà Yesù Kilistò bwà kwenza aci, wàmba bwà, kwangata bitùpà bicìbulula byà mubidi Wèndè, nè kucyènza too nè pààlukilàYe cyàkàbìdì. Nènku panwikalà nwènù bàdi biitabuuja eci nè m’Bulelèlè, nè baswè bwà kwikalakù nè cikondo cikesè cyà bwobùmwè neetù, mu nyùngulukilu wa Dìyì dyà Nzambì

kaaba aka, netwikalè nè disànka bwà nwênù—bwà nwênù kushààla neetù nè—nè kupìcila mu cikondo eci. Kabiýi nàнку to, netùtangelajè, ànu mu katanci kakesè cyanààna emu. Tudi baswè bwà nwênù kushààla pàmwè nè bakwàbò bônso, nànsha bishi, bwà nwakùmbanakù mwà kumòna mùshindù wutùdi twangata mèèsà à Mukalenge. Eci kacýèna ànu. . .

¹⁶³ Eci cidi, kàbìdì, bwà dyondopa dyà kùdì Nzambi. Nudi bamanyè nàнку anyi? Pàakadyà Izàlèèlà cifwànyikijilu eci, mwànà wa mùkòòkò, paasàkà awu, bààkenza lwendu bidimu makùmi ànaayi mu cipèèlà, nè kupàtuka kakùyi muntu nànsha umwe nè butekètè munkaci mwàbò to. Anji elàayiibi meeji ku bwalu abu, muntu nànsha umwe nè butekètè, mu bidimu makùmi ànaayi. Mèèsà à Mukalenge, cimanyinu cyà beena kwitabuuja.

¹⁶⁴ Mpindyewu, mu Kolintò wa Kumpàlà nshapità wa 11, kubangila ku mvensà wa 23, nèmbalè cyòci eci bwà dyàkalenga dyà èkèleeziyà. Pòlò ngudi wakula ewu.

Bwalu ndi mupetè kùdì Mukalenge...cìndì... munùtwàdile kàbìdì,...Mukalenge Yesù mu bufùkù bùmwebùmwe...bwàkamutungilàbo abu wàkangata dyàmpà:

Nè—nè pàakamanàye kusàkidila, wàkadìcibula, nè kwamba nè: Angàtaayi, nè nùdye: eci mmubidi wànyì, wùdì mucibùdùbwe bwà bwalu bwènù: nwikalàayi nwenza nùнку bwà kumvùluka.

Bilondèshìle mùshindù wà mwomùmwe... wàkangata lupànzà, pàakamanàye kudya didya dyà diloòlò, kwamba nè: Elu ndupànzà lwà cipungidi cipyacipyà mu mashi àanyi: enzáayi nùнку, misangu yònsò yinùdì nulùnwa, bwà kumvùluka.

Bwalu misangu yònsò yinwènà nùнку, nudyà dyàmpà edi, nè nunwà lupànzà elu, nudi...nuleeja patòòke lufù lwà Mukalenge too nè pààlwàye.

¹⁶⁵ Aci kì ncilenga anyi? “Kuleeja patòòke lufù Lwèndè too nè pààlwàYe.”

Ki bwà cinyi ewu yònsò wàdyà dyàmpà edi, nè wànwa lupànzà lwà Mukalenge elu, kàyi mukùmbànyine to, nèikalè mupùile kùdì mubidi nè mashi byà Mukalenge.

¹⁶⁶ “Eci cidi cyùmvwija cinyi, Mwanèètù Branham?” Cidi cyùmvwija nùнку: Wèwè mulwè nè mwangàte mèèsà à Mukalenge, kàdi kuya pambèlu nè kwikala nè nsòmbelu wa mùshindù mushiilàngàne nè nsòmbelu udi mwena Kilistò nè cyà kwikala nendè, udi utwàla bundù nè dyediibwa dyà màyi ku makàsà ku bwalu bwà Mukalenge Yesù Kilistò. Udi ucyùmwa anyi? Pawikalà mwena Kilistò, lwàkù. Wèwè kùyì mwena Kilistò to, kùdidingi kulwa kudya to. Tàngilàayi.

Kàdi muntu àdikenkètè yêyè mwine, nè pa nàнку àdyè dyàmpà, nè ànwè. . . lupànza alu.

Bwalu. . . (mvensà wa 29) Bwalu ewu udi udyà nè ùnwà kàyi mukumbànyine to, ùdyadya nè ùnwànwà dipiila dyèndè yêyè mwine, kàyi ùjingulula mubidi wà Mukalenge to.

Bwà bwalu ebu bààbùngi bàdi bàsaama nè batekètè munkaci mwèni, . . . bààbùngi mbalààle tulù.

Bwalu. . . bìvwa bìkèngela bwà twètù kudilumbulwisha twètù biinè, bwà kabilù kukèngela bwà twètù kulumbulwishiibwa to.

Kàdi patùdi tulumbulwishiibwa, tudi tunyookiibwa kùdi Mukalenge, bwà katùlu kupiishiibwa pàmwè nè bàà pa buloba to.

¹⁶⁷ Patùdi tudyà dyàmpà edi nè tunwà lupànza elu, tùdikenkètaayi twètù biinè, twambè nè: “Mpindyewu, ndi ngènda lwendu lukumbànyine anyi?” Èè, mèmè ncyèna ngènda lwenda lukumbànyine to, to. Kàdi Kilistò, munda mwànyì, ùdi ùmfikisha ku dyenda lwendu lukumbànyine. Ndi muMunangè. Ndi mMufidila bujaadiki. Ncyèna mupwàngàne to; ncyàdyàkwikalakù mupwàngàne to, pa buloba ebu. Kwèna mupwàngàne to; kwàdyàkwikalakù mupwàngàne to. Kàdi dinanga dyànyì kùdiYe, nè Yêyè ùndekela ngiikale nè mwoyi Bwèndè, nènku ndi munangè kucyènzà nè kuMufidila bujaadiki. Ncyèna mpàtuka nkenza maalù macimbàkàne, nè kwenza bintu bibi, bidi bitwàla bundù ku Dìna Dyèndè nànsa.

¹⁶⁸ Bwalu, mèmè mujandùle nè ndi ngènzà cintu kampàndà, dībà adi ndi munyookiibwe kùdi Mukalenge. Bwà cinyi Nzambì ùdi wènzà nàнку’s? “Bwà katwikadi twàlwa kupiishiibwa pàmwè nè bàà pa buloba to.”

¹⁶⁹ Mpindyewu, kùdi dishiilangana dinène pankaci pàà mwena kwitabuuja nè mwena bupidyà. Nzambì ùdi wènzà dishiilangana adi.

¹⁷⁰ Vùlukàayi nè, beena kwitabuuja mu Èjiipitù bàvwa bònsò munda amu, (Mwínshì mwà cinyi?) mwínshì mwà mashi. Mwànà wa mùkòòkò wùvwa mushipiibwe. Nè mashi èndè, àvwa manyaminyiibwe nè hizòpà, pa ciibi apu. Tàngilàayi kwàkatèekiibwàwù. “Pa mukamba wà ciibi,” mbwena kwamba nè mùnòkò ewu, citùpà cyà ciibi. “Mukamba wà ciibi, nè ku dikunji dyà ciibi.” Nudi numòna cìdici anyi? Nkùrusè, nkàmà yà bidimu kumpàlà kwà Mwànà wa mùkòòkò wà Nzambì kulwa nè kushipiibwa. Kàdi cifwànyikijilu cyà Mwànà wa mùkòòkò, cyàkatèekiibwa pa mukamba nè ku ciibi. Nènku mwena Izàlèlèlè yònsò, uvwa ulwa mwínshì mwà mashi awu, bàvwa bamukàndike bwà kupàtuka kàbìdi. Ki bwalu mbwòbù abu’s, babàkàndike bwà kupàtuka. Bàvwa mwínshì mwà mashi. Kabàvwa mwà kuya pàvwà mèyi matùma kaayi malwè

bwà kwasa lwendu to, mēyì matùma bwà kuya kumpàlà; cifwànyikijilu cyà Kilistò.

¹⁷¹ “Musangu wùmwè, bwalu ku Mulàmbù wùmwèpelè, Yèyè mmupwàngàje, bwà kashidi, aba bàdì bajidiibwe mu Kilistò Yesù; musangu wùmwèpelè, bwà kashidi.” Kakwèna kàbìdì dyalukila dyà paanyimà nànsha, kakwèna kàbìdì byà diya ku *cikampàndà*, kakwèna kàbìdì byà diya ku *cikansanga* to. Kaa, wèwè’s neùtwe cimpingà, wenza bintu bìdì bibì; nyingàlālā ànu cyanàànà ùlwe. Nwamònu anyi? Kàdì musangu wùmwèpelè Kilistò ùdì ùjidila musùùkà wà muntu, ku dimuuja tètè nè Nyumà Mwimpè, mmupwàngàne bwà kashidi. Ki bwalu mbwòbù abu’s, kakùcyèna kàbìdì dijinga dyà kupàtuka to. “Bwalu mukuukwidi, pàdiye ànu ùkezudiibwa kèna kàbìdì nè *civùlukilu* to,” anyi, “dijinga,” nkudimwinu mujaalàme. “Mukuukwidi, pàdiye ànu ùkezudiibwa musangu wùmwèpelè’s!” Kaa, mvw’a kujingakù ànu ngààcibweja mu ndòndò’s. “Mukuukwidi,” mwena kwitabuuja awu, “pàdiye ànu ùkezudiibwa, kèna kàbìdì nè dijinga dyà mpèkaatù to, kashidi.” Cilumbù ncikosa bwà kashidi! “Bwalu Yèyè mmupwàngàje, ku Mulàmbù wùmwèpelè, bwà kashidi, aba bàdì mu Kilistò Yesù.” Maalu à pa buloba àdì àshààla màfwè, kùcyèna kàbìdì uàcyùka to. Dinanga dyèbè nditéeka pa bintu byà ku Dyulu.

¹⁷² Mpindyewu, wèwè wamba mùdì mwena Kilistò, kàdì mucikàle ànu nè nsòmbelu yà maalu à pa buloba, dībà adi udi munkaci mwà kunyookiibwa kùdì Mukalenge, bwalu kabivwa bìkèngela bwà wèwè kupiishiiibwa pàmwè nè bàà pa buloba to. “Ki bwà cinyi, panùdì nudìsangisha . . .”

Ki bwà cinyi, bàna bèètù wanyi, panùdì nudìsangisha bwà kudyà, nwìndilanganè muntu nè mukwèndè. (Tàngilàayi.)

Nènku muntu yèyè nè nzala, àdiilè kwèndè kumbèlu; bwà kanùlù kudìsangisha bwà dipiishiiibwa to. Nènku bwà bìdì bishààla . . . Nèmbitèèkè mu bulongàme pàngààlwà.

¹⁷³ Nudi numòna Pòlò kaaba aka. Beena Kolintò abu, kabààkacyùm vwa to. Kuyabò kuntwaku, nè kudyàbo nè kukwàcìkabò maalà ku mèèsà à Mukalenge. Nènku kudyàbo nè kunwà, kwenza byònsò bibì. Pòlò mmwambè nè: “Panùdì nudìsangisha, muntu yèyè nè nzala, àdiilè kwèndè kumbèlu. Kàdì panùdì nudìsangisha, nwìndilanganè muntu nè mukwèndè.” Mu ngaakwilù mukwàbò nè: “Nwìndilanganè muntu nè mukwèndè.”

Wèwè udi wamba nè: “Mpindyewu, mwanèètù kampàndà nyèyè ewu ùndì ncìyì ngèèla meeji nè ùdì nè cyà kwangata mèèsà à Mukalenge to.” Èè, kwàshi lubilu kuntwaku bwà kumwela pambèlu to; ikàlà nendè nè lutùulù. Paanyimà pàà disangisha dimanè kujika, mu mùshindù kampàndà mwimpè,

lwàkù kwèndè ku nzùbu dilòlò kampàndà nè nùsòmbelessè panshì, ambà nè: “Mwanèètù, ndi... Ùmfwileku luse piikalàbì nè ndi mupiiile. Kàdi mvwa mukumòne kaaba aka, ditùkù adi, mu mùsèèsù mwàmwa, mukwàcike maalà,” cyònsò cìvwàye wènza aci: “upàtuka nè inàbànzà mukwàbò kampàndà uvwa kàyì mukàjèèbè to, kàdi ngwèwè ewu udyà mèèsà à Mukalenge. Ndi mukunange, mwanèètù. Lekèlà—lekèlà wèwè nè mèmè tusambidile bwalu ebu nè tubùlongòlòlè.” Nwamònu anyì? Indilàngànaayi muntu nè mukwèndè. Ikàlaayi basadidyanganyi muntu nè mukwèndè. Kwìkadi munène mutàmbe muntu mukwàbò to. Teetà bwà kumòna mùshindù wùdì mwà kwikala mukesè.

¹⁷⁴ Misangu yàbùngì ntu ànu muumvwè, bàmba nè: “Kwikadikù munène ku mèsù kwèbè wèwè to.” Wèwè munène, ciikale ku mèsù kwà Nzambi. Ku mèsù kwèbè wèwè ikàlà mukesè. Muntu yònsò udi udìpwekesha awu, Nzambi neàmubàndishè. Kàdi aba bàdì bàdibàndisha abu, Nzambi neàbàfikishe ku dipwekeshiibwa. Nwamònu anyì? Ikàlà mukesè.

¹⁷⁵ Muntu ewu ùdì wàmba nè: “Èè, yèyè’s ùdì...”

“Èè, ndi mumanyè kàdi ndi...yèyè’s mmwanèètù. Ndi muswè kwikala mumusadidi, nudi numòna’s.” Ikàlaayi basadidyanganyi muntu nè mukwèndè. Nangàngànaayi muntu nè mukwèndè, mu mùshindù wà nè, kaa, ekèlekèle, wà nwènù—nwènù...

¹⁷⁶ Tuvwa nè ciibidilu cyà kwimba kaamusambu kakesè. Ncyèna mumanyè ní nudi bakàvùlùke mpindyewu’s. Tuvwa mwà kwimba nè:

Mwonjì wùdì wùswìkakajà ùbèneshiibwè
Myoyi yètù mu dinanga dyà bwena Kilistò;
Bwobùmwe bwà meeji à buuwetù
Mbufwànàngàne nè bwà ku Dyulu.

Patùdì tutàpuluka,
Bìdì bitùsaama ku mwoyi;
Kàdi netwìkalè ànu baswìkàkàne mu mwoyi,
Nè batèkèmène bwà kutwìlanganaku
cyàkàbìdì.

¹⁷⁷ Pangààkiimana kuntwaku mu nkità yà Saint-Angelo ayi, nè kutàngila myadija kuntwaku, eku nè eku, bu mu ntàntà wa kilòmeètà umwè nè citùpà, mwínshì mwà buloba, nkità, mùvwàbo nè cyà kujiika bafwè bààbò. Kàdi lwà mu ditumba amu mwàkadi tuunkita tukesè menemene, atu tùvwà twà bânà, mùvwàbo bàtèèka bânà mu ditumba amu. Nènku kùvwà kaèkéleeziyà kakesè kuntwaku, kùvwàbo nè cyà kusokomena.

¹⁷⁸ Mèmè kupweka kuntwaku mu kàtèdralè kàà kale kàà beena Loomò mùvwàbo bàbwòshila ku dikunji, bàbèèlela nyama yà ntambwe bwà kubàdyayi. Mèmè kupàtuka mwaba awu munkaci mwà wòwò mwaba awu, nè kwimana mwaba awu.

Mémè kukènzakana. Ncivwa mwanji kucimòna to. Bitoci byònsò bivwà bipònemù abi; kàdi's ke myaba minène mùvwà nyama yà ntambwe yipàtukila amu. Mémè kwenda too nè lwà mwaba wùmvwà ngèèla meeji nè ke wàkadì bwinà bwà ntambwe, mùvwà beena Kilistò bàfwila. Mémè kwela byanza byànyì muulu; kwimana mwaba awu. Mémè kwamba ne: “Éyì Yesù, mémè's ndi cìfùkiibwà cìdì kaciyi cikùmbànyine to, pa kwela meeji nè bânà bèètù bààkatwà cìtampì ku bujaadiki bwàbò kaaba aka, mukana mwà nyama yà ntambwe, nè bikwàbò, bwà bwalu bwà Yesù Kilistò.”

¹⁷⁹ Kwenzekabi nè ngìmanè, nè ntàngilè paanyimà pàànyì, nè muntu kampàndà ùvwa mubàndishe nkùrusè wa kale mukàyàbàle awu kuulu, mwimànyine lwà kuntu kwàka. Mémè kubanga kwimbila mu mwoyi wànyì nè: “Pa kakùnà kule kwàka kùvwa kwimàne nkùrusè mukàyàbàle wa kale awu, dibèndelà dyà dikèngà nè bundù.”

¹⁸⁰ Mùvwà bantu abu munda mwà bikondo; buloba bujimà mbubolesha nè mashi à Mukalenge. . . bafwile diitabuujà bàà Mukalenge Yesù Kilistò. Mémè kudyàmbidila nè: “Nkantu kakesè kaayi, kàà kale katùdì twètù aba's wè!” Pàndì ngèèla meeji bwà kwenza kalwendu kakesè kàà bumpàndànjlà, pàmwàpa bikèngela bwà mémè kutwàla kaadikengeshiibwa kakesè, kàà muntu kampàndà ùkuseka. Ndi nshààla ciibùlùndù, mu mùshindù wà—mu mùshindù wà bantu bàmbùnguluja bikolè. Aci kaciyèna nè cidici cishintulula to. Bààkabùnguluja bantu eku nè eku kumpàlà kwànyì. Bààkenza bintu byà mùshindù awu, nè kubùkila nè *cikampàndà*, *cikansanga*, anyì *cikankènga*. Ndi nè Èvànjeeliyò wa kuyiisha; ndi nè Mukalenge ùndi munange; ndi nè kiipàcilà kàà kukùmbaja. Nènkù pangààfikà ku ndekeelu wa njila, ndi muswè kulwa, nè yònsò wa kunùdì, ngàmba nùnkù ewu nè: “Ndi mulwangàne mvità mimpè.”

¹⁸¹ Dimwè dyà ku malòòlò aa, kakùyì mpatà to, nèndisangàne mwimàne ku cyambilu, piikalà kwisù kwànyì eku mwà kutòòkoloka, mishikù yànyì neyidibùtè, nè nèngìikalè. . . Ntu misangu yònsò ànu muswè kupicila mu cyambilu mùshindù awu, kwalukila ku Butùmbi. Dimwè dyà ku matùkù àdì panshi aa, nényiishè diyiisha dyànyì dyà ndekeelu. Nèngènè dibùkila dyànyì dyà ku cyoshelu dyà ndekeelu. Nènsambidilè mubèèdì wa ndekeelu. Ndi muswè kufwà nè Bible mu cyanza cyànyì, mwikàle nsòka Dìna dyà Mukalenge Yesù Kilistò. Kulwangana mvità mimpè; kujikija lùbilu.

¹⁸² Bânà bèètù bàà balùme nè bàà bakàji bananga, cyònsò cìdiku aci, piikalàku cintu kampàndà mu nsòmbelu webè, cibèngangana nè Kilistò, tucitondè, tuseemenàayi kaaba aka mpindyewu bwà kwangata mèèsà à Mukalenge; tusanga myoyi yètù pàmwè bu bwobùmwè bwà diitabuujà dyà bwena Kilistò, bwà kulekela Mukalenge wetù Yesù ùmanya nè tudi baMunangé

nè mwoyi wètù wònsò. Udikù mwà kucyènza mpindyewu patùdi twimba apa anyi? (Nènku, Teddy, bu wèwè mwà kuswà. . .)

¹⁸³ Ngèèla meeji nè bàdi bàlwa ku nseke yònsò. Ncyà bushùwà anyi, mwanèètù? [Mwanèètù Neville ùdi wàmba nè: “Èyowà.”—Muf.] Mpindyewu bu bakùlù mwà kulwakù kumpàlà eku mpindyewu bwà kutùkwàcisha, nè kwimana kaaba aka. Kàdi mpenyi panùdi nubangila, nduseke kaayi, Mwanèètù Neville, *elu* luseke anyi? [Mwanèètù Neville ùdi wàndamuna.] Èyo. Bàna bèètù aba mpindyewu, bàdi nè ndongolwelu kaaba aka, wa mùshindù wutwikala twètù bònsò katùyi mwà kulwa dyàkàmwè to.

¹⁸⁴ Nènku mpindyewu nudi nulwa bwà kudyà neetù mèèsà à Mukalenge pàmwè. Netwikalè nè disànkà bwà nwènu kudyà neetù pàmwè mèèsà aa. [Katùpà kàà mukàbà wà mèyi munda mutupù—Muf.]

¹⁸⁵ Ndi mutwìshìibwe nè tudi bònsò mwà kwamba, dilòòlò edi nè, tudi nè disànkà bwà mutùdi beena Kilistò. Cyenzedi citùdi bafùme ku dyenza aci, ncyà kùkaadi bidimu bìipacila ku binunu bibidi. Kumpàlà kwà diya dyà Mukalenge wetù Yesù, Yèyè wàkatùtùmina dīyi bwà kwenza cyòci eci, nè bwà kucyènza too nè pàalukilàYè cyàkàbidi. Nè Yèyè mmutùpè ditwìshìibwa dyà Dīyi Dyèndè Yèyè mwinè, didi kadiyi mwà kupangila adi, kadiyiku mwà kupangila nànsa. Yèyè wàkamba nè: “Ewu udi udyà mubidi Wànyi nè ùnwa Mashi Àànyi ùdi nè Mwoyi wà kashidi, nè Mémè nēmmubiishè ku lufù ku Ditùkù dyà ndekeelu,” Yone Munsantu nshapità mwi6.

¹⁸⁶ Aci cidi cimpèèsha ditèkemena dyàbùngi, paanyimà pàà mumòne ntèndeleele yà mashimi yà pa buloba; dikuukwila dyà dībà, nè dikuukwila dyà mpìngù, nè mmwèneni yàbò yònsò yà buumùntù butàmbe-mfùkulu ayi. Kàdi, nànsa nànkù, kumòna Dīyi edi, mùshindù wùdiDi kadiyi mwà kupangila’s wè! Nè Yèyè Utu mujaadike nè kaDyèna mwà kupangila awu, mmutùpèèshe mulayi Wèndè wà Nzambì ewu, wà nè Yèyè neàtùbiishè ku lufù ku Ditùkù dyà ndekeelu.

¹⁸⁷ Mpindyewu, bwà beenyi bàdi batwèndèle, kùdi ànu kantu kakesè ndambù ku eci katàmbe citùdi bafùme ku dyenza. Nènnùbadilèci, dyàmbedi, mu Bible, mu Yone Munsantu nshapità wa 13, mvensà mwi2, kubangilakù.

Nènku didyà dyà dilòòlò dimanè kujika, dyabulù mumanè. . . kutèeka mu mwoyi wà Yudààsà Mpongoloki, mwàna wa Simonà, bwà kumutungila;

Yesù mumanye nè. . . Taatù ùvwa mufile bintu byònsò mu cyanza cyèndè, . . . nè yèyè ùvwa mufumìne kùdi Nzambì, nè muyè ku Nzambì;

Yèyè kujuuka ku didyà dyà dilòòlò adi, . . . kutèeka bilàmbà byèndè ku luseke; nè kwangata ditwàyà, nè kudijingiladi.

Paanyimà pàà cyôci aci yêyê kupôngolola mâyi mu mbaafù, nè kubanga kwowesha bayîdi mâyi ku makàsà, nè kubàkùpula nè ditwàya dyàkadîaye mudîjîngile adi.

Pashîishe kulwayê kûdi Simonà Peetèlò: . . . Peetèlò kumwambilayê nè: Mukalenge, wêwê ungowesha mêmè mâyi ku makàsà anyî?

Yesù kwandamuna nè kumwambila nè: Cîndi ngenza mpindyewu eci kwêna mucîmanyê to . . . ; kâdi neûmanyê pashîishe.

Peetèlò kumwambila nè: Wêwê kwàkungwovesha mâyi ku makàsà àanyî to. Yesù kumwandamuna nè: Mêmè nciyi mukwowêshe mâyi to, kwêna naanyî mu bwobûmwê to.

Simonà Peetèlò kumwambila nè: Mukalenge, kî ng'ânu makàsà àanyî nkàâyawù to, kâdi . . . byanza byànyî nè . . . mutù.

Yesù wàkamwambila nè: Ewu udi mwowêshîibwe, kabyèna bìkèngela bwà kwowa . . . ânu kwowa mâyi ku makàsà èndè, kâdi mmukezûke mu kantu nè kantu kònsò: . . . nudi bakezûke, kâdi kî mbònsò to.

Bwalu yêyê ûvwa mumanyê ewu uvwa nè cyà kumutungîla; kî bwà cinyî wàkamba nè: Nwênù bònsò kanwêna bakezûke to.

Nànkù paanyimà pàà yêyê mumanè kubwòwesha mâyi ku makàsà, nè mumanè kwangata bilàmbà byèndè, nè . . . kusòmba panshî cyàkàbîdî, kubàmbilayê nè: Nudi bamanyê cîndî munwenzèle eci anyî?

Nudi numbûkîla Mulongeshî nè Mukalenge: nènku nudi nwamba bîmpè; bwalu ke cîndî.

Pûikalàbî dîba adi nè mêmè, Mukalenge wenù nè Mulongeshî, munwowêshè mâyi ku makàsà; nwênù . . . bìvwa bìkèngela kwoweshangana mâyi ku makàsà muntu nè mukwèndè.

Bwalu ndi munùpèèshe cileejîlu, bwà nè nwênù nudi nè cyà kwenza mungânwènzèdî emu.

. . . nudi bàà disànka bu nwênù mwà kumanya bintu ebi nè kubyènzà.

¹⁸⁸ Cîtu ndîyi ditùma dyà tabernacle ewu, mu—mu cikondo cyà bidimu makûmî àbîdî nè byà mu njila byà diikalakù dyèndè, bwà tutu misangu yònsò twenza dyoweshangana dyà mâyi ku makàsà. Ba-Baptistes bààkacyenza kumpàlà kwà Mpenta; Mpenta wàkacyènzà mu matùkù à mbangîlu; pashîishe kutùngunuka naaci. Nànkù tûdi, dilòlò edi, bu misangu yònsò ànu tutùmîkîla dîyi ditùma edi.

¹⁸⁹ Tudi nè mwaba, kaaba aka, wùbùikidiibwa nè cibambalu cyà disambila. Bainábànzà bàdi bàbwela mu cyôci aci, bwà kutùmikila dīyī dinène ditùma didi Nzambi mutùshīile edi.

¹⁹⁰ Nènku bantu balùme bàdi bàbwela mu cibambalu amu, ku disambila. . . ku bìrô ebi lwà *kaaba aka*, bìrô byà balami. Nènku tudi twenza dyoweshangana dyà màyī ku makàsà.

¹⁹¹ Nènku wêwê, mwenyi, udi neetù dilòlòlò edi awu, kī mmwenyi to, kàdi mwena mwàbò wa mu Bukalenge, pawikalà kacya kùyikù mwanjì kutùmikila eci to, mulùme anyi mukàjì, tudi tukulòmba nè mwoyi mujimà nè tukubùikila bwà kulwa kudisanga neetù mu bwobùmwe ebu. Nènku pawikalà kacya kùtukù mwanjì kucyènzà kwònsò eku to, tudi bafwànyine kwikala nè disànkà dyà kwikalakù neebè mu bwobùmwe dilòlòlò edi, bwà musangu wèbè wà kumpàlà, pàmwè neetù. Nànsha nànkù, wêwê kùyì udyùmvwa nè udi muswè kucyènzà to, cintu kampàndà cikulubakaja bwà kwalukila kwèbè kumbèlu dyàkàmwè, anyi cintu kampàndà, tudi baswè kwamba nè tudi nè disànkà bu munùvwà neetù kaaba aka dilòlòlò edi.

¹⁹² Ndikù ndòmba luse bwà dikòsoloja dyà diyīisha dyànyī, nè bikwàbò, mùshindù wùndi mwenze, ncyèna ànu muyiishi wa menemene to, twamb'eku twamb'eku, nè pashīishe, mbyenze ànu bu bilwè mu mùshindù wà kawùyì mwelela meeji to, ncyenze bu cicikolèshekù ndambù bwànyī. Pashīishe ndambù, pàmwàpa, Mukalenge neàngambùlwishè mu maalu aa.

¹⁹³ Nènku pàmwàpa paanyimà pàà mèmè mumanè kufùma ku wesètè. . . Ndi ntèkemena nè Mukalenge ùdi ùmpèèsha diikisha dīmpè kuntwaku, bwà ngaamòna mwà kwalukila, nè pàmwàpa pàmwè nè Mwanèètù Neville nè mèmè twenza ditàbuluja dīmpè dyà nkulunkulu mwab'ewu bwà ndambù wa malòlòlò, pa dilongesha dyà Dīyī.

¹⁹⁴ Kùdi muntu kampàndà, udi mufùme ku ditwilangana naanyī leelù ewu, mmuswè kubàtiijibwa mu musulù mwàmwa. Ndi mufwànyine kwikala nè disànkà dyà kubàtiiza muntu kanà yònsò, mu mwaba kanà wònsò ewu. Bìdi ànu bīmpè. Mpindyewu, tudi. . .

¹⁹⁵ Tudi misangu yònsò ànu tunùjingila difika dilenga mu Branham Tabernacle. Twètù katwènakù dīgumba to. Katwèna tubèngangana nè màngumba to, kàdi katwèna ànu bàà cyena-màngumba to. Pa nànkù, tudi ànu misangu yònsò tunùjingila difika dilenga. Katwèna nè buumambàlà kaaba aka nànsha bùmwe to. Tudi ànu nè bwobùmwe muntu nè mukwèndè, pàdibi nè: “Mashi à Yesù Kilistò, Mwànà wa Nzambi, àdi àtùkezula ku—ku bubì bwònsò.”

¹⁹⁶ Nènku too nè patwàsangilà cyàkàbìdì, ditalala nè ngàsà wa Nzambi bìikalèku nè muntu nè muntu wa kunùdì. Ndi ndòmba bwà Nzambi ùmusheku bubèèdi munkacì mwènù, nè ànupèèsheku lwendu lwìmpè, lwà dikùbiibwa mu dyalukila

kumèènù dilòòlò edi, bukolè bwà mubidi nè dikàndà, batèkèmène bwà kutwilangana neenù kaaba aka mu diisâtù dilòòlò.

¹⁹⁷ Too nè ku díbà adi, ngàsà Wendè ìkalè neenù, patùdì tujuukila kuulu apa bu nwênù mwà kuswà. (Mpaasàtà, angàtà . . .) Mpaasàtà ewu, Mwanèètù Neville, neàtangalajè mu mwâkù wà disambila. 

54-1003^E Cidimu Cyà Cyanga
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org